

醫方類聚卷之三十五

傷寒門九

傷寒類書二

傷寒傷風脈證

傷寒無汗惡寒攻緊濇浮兮慘在容自汗



惡風浮緩脈面光不慘是傷風

傷風脈浮而緩自汗惡風頭疼面光發熱煩燥手足不寒熱勝於寒耳風傷衛氣表虛自汗法當解肌桂枝湯敗毒散獨活散人參羌

活散可選用之若項背強桂枝加葛根湯裏
寒不飲水者桂枝去芍藥加附子湯或加乾
薑臟腑滑者和解散若鼻塞通關散或發汗
漏不止而惡風四肢拘急桂枝加附子湯壯
熱煩燥人參羌活散參蘇飲或天麻防風圓
薄荷泡湯調下脉濡緊自汗勿用桂枝湯當
用小建中湯 傷寒脉浮而緊無汗惡寒頭
疼面慘發熱拘急手足微寒寒勝於熱耳寒
傷榮氣表實無汗法當發汗麻黃湯麻黃葛

根湯人參順氣散可選用之頭痛甚者葱白
湯或熱多寒少脉弱無陽只用桂枝二越婢
一湯或喘急者可與麻黃湯尺脉遲而血少
者黃耆建中湯 淋家衄家瘡家虛家四動
氣不可汗可與小柴胡湯 大陽脉浮有汗
爲傷風脉緊無汗爲傷寒 陽明善飢爲傷
風不食爲傷寒 少陽耳 目赤胷煩滿爲
傷風口苦咽乾目眩爲傷寒 三陰傷風但
四肢煩疼

傷風見寒傷寒見風脉證

熱盛而煩手足溫風生寒脉緊浮全不煩
少熱肢微厥寒證兼風浮緩然

傷風見寒脉傷寒見風脉爲榮衛俱受邪用
大青龍湯然大青龍不可輕用須是風寒俱
盛又加煩躁一證方可與之敘易簡者謂二
證交攻則桂枝麻黃湯兼用尤爲穩當

三陽合病

太陽合胃脉浮長若是浮弦合少陽膽合

胃時弦不短更將外證互推詳

太陽陽明本太陽病若汗若下若利小便無
津液胃中燥轉屬陽明故大便堅小便利是
爲脾約脾約圓麻子仁圓主之若惡寒則用
升麻葛根湯不惡寒反惡熱大便秘或譫語調
與白虎湯不惡寒反惡熱大便秘或譫語調
胃承氣湯下之喘而胃滿者不可下用麻黃
湯 太陽少陽頸項強急脇下鞭滿目眩往
來寒熱諸證並小柴胡湯 少陽陽明本少

陽病因發汗利小便後胃中躁大便難屬調胃承氣湯。正陽陽明本經風盛氣實也。大柴胡湯。大小承氣湯主之。又三陽合病腹滿身重而垢譫語遺尿口中不仁屬白虎湯。或舌乾口燥不仁背惡寒者通用太陽陽明少陽陽明正陽陽明無表證者俱可下。惟惡寒中寒爲太陽陽明合病未過經却屬表可發汗用桂枝麻黃各半湯。蓋在經則汗過經則下也。三陰無合病。

太陽陽明併病

太陽陽明併病。不惡寒。身裏未寧。全入陽明。須下劑。汗之猶在太陽經。

太陽陽明併病。本太陽初病發汗而汗出不徹。轉屬陽明。續微汗自出。不惡寒。是併歸陽明也。若大陽證尚在。桂枝麻黃各半湯。若太陽證已退。但有陽明者。大承氣湯下之。

春溫夏熱

春溫浮緊。易經安發熱。頭疼渴嗽。干夏月。

傷寒為熱病脈來洪盛療應難

溫病發於春間及夏至以前是也發熱咳嗽
頭痛身疼口中燥渴脈來浮緊特其病輕耳
熱多者小柴胡湯熱少者升麻湯解肌湯微
熱不渴者小柴胡加桂 渴者小柴胡去半
夏加人參括蕪根脈實煩渴大柴胡微利之
以其實而大便秘也虛煩用竹葉湯 嗽者
小柴胡加五味子 夏月傷寒是為熱病發
熱頭疼肢體痛重或惡寒或惡熱其脈洪盛

用藥不可太溫如桂枝麻黃青龍湯之屬須
以黃芩升麻佐之 熱病三日外脈仍數邪
猶在經絡未入臟腑者桂枝石膏湯三月至
夏謂之晚發梔子升麻湯

風溫濕溫

風溫熱汗脈多浮喘渴癡眠體不收腹滿
脚寒頭目痛濕溫譎熱汗頻流
風溫尺寸俱浮素傷於風因而傷熱風與熱
搏即發風溫惟其有風則四肢緩縱而不收

也其證身熱自汗頭疼喘息發渴昏睡或體
重不仁謹勿發汗汗之則讖語燥擾目亂無
精張氏又云寸脉浮滑尺脉濡弱亦不可下
下之則失洩直視若被火則發黃瘵瘵狀如
驚癩皆變逆之證耳 病在少陰厥陰二經
用萎蕤湯人參敗毒散 身灼熱知母乾葛
湯 渴甚括萸根湯 脉浮身重汗出漢防
已湯誤汗用防已黃耆湯救之 龐氏用葛
根龍膽湯證治論用小柴胡湯未醒者柴胡

桂枝湯取微汗 痰壅金沸草散咳嗽加杏
仁細辛五味子 濕溫寸濡而弱尺小而急

素傷於濕因而中暑濕與熱搏卽發濕溫其
狀胃腹滿頭目痛發壯熱若妄言身上汗多
兩脛逆冷倦怠惡寒若妄發其汗使人不能
言耳聾不知痛處其身青面色變是重暈而
醫殺之 濕溫病在太陰經用白虎加蒼朮
湯更加官桂 濕氣勝則一身盡痛發熱身
黃小便不利大便反快用除濕湯五苓散臍

腑虛大便滑者理中湯加蒼朮白茯苓虛滑
其者朮附湯 暑氣勝則壯熱煩躁小便不
利大便閉澁用香薷散治要六和湯臟腑閉
而煩渴者白虎加蒼朮湯

風濕中濕

風濕浮兮額汗微腫疼發熱喜重衣身黃
熱痛沉而緩中濕腸踈小腑稀

風濕脉浮先傷濕而後傷風故也外證肢體
腫痛不能轉側額上微汗怯寒而不欲去衣

大便難小便利熱至日晡而劇治法但微解
肌若發正汗則風去濕在非徒無益而又害
之 治法微解肌用麻黃杏子薏苡甘草加
白朮防己黃耆湯不嘔不渴脉虛浮濇者桂
枝附子湯 濕多身痛小便不利甘草附子
湯煩渴小便不利五苓散 外不熱內不渴
小便自利朮附湯緩弱昏迷腹滿身重自汗
失音下利不禁白通湯多加白朮少用甘草
身腫痛微喘惡風杏仁湯 通用人參敗毒

散熱而煩渴者加括蕒根若誤下之小便必不利可與五苓散 中濕脉沉而緩風雨襲虛澤潤蒸氣人多爲濕所傷也一身盡痛重著發黃關節煩疼發熱鼻塞時或脹滿大便利小便難其外證耳濕家不可汗汗之則發瘥熱而瘥者死亦不可下下之則額汗胷滿微喘而噦小便不利全濟亦難經云治濕之法不利小便非其治也 中濕小便不利大便自利甘草附子湯五苓散或除濕湯加茯苓

苓主之大小便皆自利則與朮附湯身體痛或鼻塞黃耆建中湯小建中湯寒濕交攻疼痛重著易簡滲濕湯甚者生料理中湯加熟附子 風寒氣濕合而爲痺其何以爲之治曰寒多則爲疼痛當用官桂乾薑附子風多則爲走注當用麻黃薏苡烏頭中氣則爲堅滿紫蘇陳皮枳殼所不可闕中濕則爲重著能以茯苓蒼朮乾薑主之應手而愈

溫毒春間斑發瘡嘔而咳悶透心腸背寒
面垢虛來脉自汗焦煩是暑傷

溫毒者冬間感受寒毒乖氣至春而發也表
證未退毒氣不散所以發斑肌肉疹紋心下
煩悶嘔逆咳嗽後必下利寸脉洪數尺脉實
大其爲病重蓋陽氣盛耳 治法通用玄參

升麻湯黑膏亦主之或用敗毒散加紫草咳
悶而嘔清汁者葛根吉皮湯證治論黃連橘
皮湯 中暑脉虛弱或沉伏身熱背寒面垢

自汗煩燥大渴毛聳惡寒昏昏倦怠而身不
痛經云寒則腠理閉暑則腠理開開則洒然
寒閉則熱而悶體認不精以傷暑爲熱病誤
人多矣 內外俱熱口燥煩渴四肢微冷而
不痛白虎湯 痰逆惡寒橘皮湯熱悶不惡
寒竹葉石膏湯 頭疼惡心煩躁心下不快
五苓散消暑圓 霍亂吐瀉香薷散溫服
信効方中暑用小柴胡湯脉芤遲腠理開洒
然毛聳口前開而板齒燥用白虎加人參湯

傷暑發大熱頭痛自汗咽疼煩燥腹中熱結
諸藥不効者小柴胡湯最良小便不利五苓
散 熱病中暑濕溫雖皆因暑所致然脉證
不同當明辨之熱病者冬閒感寒至暑氣盛
而後發此卽夏月傷寒但熱多而脉洪盛是
也中暑者病在太陽外證與熱病相似但熱
病脉盛肢節痛重中暑脉虛肢節不疼兼而
垢背寒而手足微冷是也濕溫者濕熱相搏
致之病在太陰其脉寸濡而弱尺小而急外

證胃腹滿頭目痛身熱汗多而足脛逆冷是
也以上三證夏月病多有之須別其名庶無
毫釐千里之繆 凡夏月傷暑雖則熱毒作
恙皆因脾胃虛怯而得之胃虛然後伏暑伏
暑然後煩燥其有飲水過多及用解暑冷藥
太過傷動其中真氣內虧嘔吐不食自利不
渴六脉沉微按之隱隱是爲裏寒外熱如陰
盛隔陽之類不可更泥中暑伏熱之說急以
理中湯甘草薑湯與之縱或微煩小便不

利斷不可以爲熱也又有冷藥過度胃寒停水潮熱而嘔或身熱微煩此亦陽浮外而不內可與小半夏伏苓湯或加前胡脾胃素弱者二陳湯主之雖然抑猶有戒也夏月病多傷暑暑家脉虛面鰲冷汗手足微寒苟不揣其裏熱之證妄以剛劑投之抱薪救焚不發黃則發斑甚至蓄血悶亂而死矣可不遡源徂流而精審云八假如夏月泄瀉不止胃脘閉隔飲食不進或心腹痛滿大抵因暑得之

泄瀉中滿者香薷散加縮砂下消暑圓心腹刺痛者香薷散加縮砂下蘇感圓俱得其便假如夏月下痢或赤或白煩渴嘔逆腹中攪痛小便不利是亦因暑致之可與五苓散香薷散小柴胡湯黃龍圓之屬若以此嘔證爲脾胃虛寒則誤矣

痧病溫瘧疫癘

痧甚風癘強體肢柔剛二證汗譫推後寒先熱名溫瘧疫癘之邪責四時

瘧者先傷於風又感寒溫致之發熱腹痛口
噤頭搖瘈瘲不語項強背直腰身反張或目
疼或目赤或閉目或反目或足冷或足溫或
妄行其脉沉弦而遲亦或帶緊此爲惡候不
救者多若脉如雨濺散出於指外者旦暮殂
也傷風頭痛發熱常出微汗又自嘔逆汗之
必發瘧新產血虛汗出傷風亦致發瘧大發
濕家汗亦作瘧熱而瘧者死瘧初發來多有
腹痛之證內經曰戴眼反折瘈瘲汗出如珠

著身不流太陽絕也其謂是乎 發熱無汗
惡寒譫語爲剛瘧曰陽葛根湯麻黃葛根湯
發熱有汗不惡寒爲柔瘧曰陰桂枝加葛根
湯桂枝栝蒌葛根湯 二瘧通用小續命湯
陽瘧去附子陰瘧去麻黃 剛瘧胃滿口噤
咬齒脚攣臥不著席大承氣湯下之 柔瘧
桂心白朮湯附子防風散八物白朮散桂枝
煮散 溫瘧卽壞病也尺寸俱盛先熱後寒
吐汗下後重感於寒得之寒多者其脉弦遲

熱多者其脉弦數寒熱乃陰陽之爭也或者
談論傷寒誤藥壞病吐汗下後續生寒熱則
曰瘧未必死所幸分而成之不思古人一藥
對一病藥進病除安有所謂分爲寒熱者哉
噫此可爲智者道也 先熱後寒及寒熱相
等並小柴胡湯先寒後熱小柴胡湯加桂
多熱但熱而燥少與白虎湯或白虎加桂湯
多寒但寒者柴胡桂薑湯治中湯加桂虛人
寒甚七棗湯 熱多痰多嘔不入食二陳湯

加烏梅 小便赤澁汗出煩渴素有瘴氣不
伏水土而嘔五苓散 大便秘嘔吐寒熱無
時脉小緊者大柴胡下之 瘧脉自弦弦數
多熱弦遲多寒遲弱可溫緊浮可汗緊實可
下浮大而胃滿者可吐 經云夏傷於暑秋
必病瘧固非傷寒之謂然壞傷寒有溫瘧一
語若纏綿不已腹中必有癥瘕用藥對治或
者殊途而同歸活人書以祛邪圓取吐久不
愈者服瘧母煎圓亦諸瘧中通用之劑耳惟

癥瘕能生寒熱凡瘕皆有水惡血包裹而成也瘡母煎圓中有逐水破血之劑爲能下之痰水在上者祛邪圓中有常山爲能吐之瘡家多蓄黃水若水不在於上焦則常山亦能下之也一法常山檳榔一倍草果烏梅炙甘草各半新汲水隔宿煎凌晨服又法青蒿革丹等爲細末研蒜入蠟圓如桐子凌晨三十粒棗湯下此皆勝藥嘔者可與二陳湯痰飲中節致生寒熱者亦與二陳湯餘見似瘡條

例 疫癘傳染老幼皆相似調治一也寸濡弱尺弦緊或肝脉濡細是雖責邪四時然發汗吐下條例通行故曰明知逆順正行無問雖然陰陽表裏條例通行固也然其毒癘之氣蘊蓄于中亦須隨其溫涼權其輕重而利導之度毒有所泄則易爲力也 病源云挾毒癘之氣壯熱煩毒發爲心腹脹滿者不治春感清邪在肝升麻葛根湯解肌湯 夏感寒邪在心調中湯射干湯半夏桂枝甘草湯

秋感熱邪在肺白虎加蒼朮湯發黃瘧茵陳
調五苓散 冬感溫邪在腎亦名冬溫萎蕤
湯 土無正形因火而名當隨經取之此大
槩然耳 寒證者聖散子熒火圓神明散可
選用聖散子內用朮附豆蔻良薑只可施之
寒濕母惑於通用之說 溫疫通用敗毒散

痰證傷寒類傷寒

有痰頭項皆和暢外熱憎寒寸浮上頭疼
右數身不疼左手脉平傷食狀

痰證寸口脉浮發熱憎寒惡風自汗胃脘妨
滿氣上衝咽不能喘息頭不疼項不强爲異
耳 有熱用柴胡半夏湯金沸草散易簡參
蘇飲無熱二陳湯溫膽湯 非次頭疼者胃
膈滿發寒熱亦是痰證但脉緊而不大瓜蒂
吐之此不可謂痰證例無頭疼當以他證參
之也 傷食右手關脉緊盛而數頭痛發熱
惡寒但身體不疼中脘痞悶噎噎食臭爲異
耳熱邪伏於脾胃則食不能消經云人迎緊

盛傷於寒氣口緊盛傷於食人迎主外風寒入之氣口主中飲食傷之是以有左右手之別中脘痞悶嘔而熱者二陳湯加生薑烏梅寒多不甚熱者治中湯五積散心腹滿痛者大柴胡下之胃膈實而嘔吐者食在上腕瓜蒂散吐之夾食傷寒證候按病源云下後六七日不大便煩熱腹滿而痛爲胃中有乾糞挾宿食故也審如是則夾食傷寒卽太陰積證腹滿時痛桂枝湯加大黃者

是爾所以太陰受病主胃膈臑脹嘔吐飧泄朱氏以爲飲食得之如曰太陰證飲食不節胃膈不快用理中湯加青皮陳皮或枳實理中圓或二陳湯皆其治也今推明治法有表者與治中湯去白朮多用青皮有表復有裏者與桂枝加大黃湯若表證已解但有裏證者小承氣湯與之可也張氏云傷食者剉大黃三五粒入湯劑中正此意耳雖然夾食傷寒則脾胃已傷暴加轉下不可也妄發其汗

亦不可也識者於此又當權衡餘見霍亂條
例二夾食傷寒便見吐利厥逆而不挾表證
者依陰病及霍亂等治之若吐利厥逆而挾
表證者卽依先救裏後救表之法

虛煩脚氣類傷寒

虛煩身首全無痛脉自和平多熱壅轉筋
惡食大便難脚氣酸疼而弱腫

虛煩諸虛煩熱也不惡寒身不痛頭不疼脉
不浮不緊數爲異耳傷寒亦有虛煩見
胃滿煩燥條例重者

竹葉湯輕者小柴胡湯嘔者大橘皮湯並不
可汗下 陰證虛煩外熱內寒肢節疼痛陰
旦湯 脚氣初病發熱憎寒頭痛嘔噦惡聞
食臭肢節酸疼大便艱難或胃滿腹痛卒起
而脚轉筋屈弱攣痛腫重痺頑爲異耳 脚
氣通用三和散降氣湯大流氣飲烏藥順氣
散分氣紫蘇飲木瓜散只可二仁圓石南圓
枳殼散用木瓜煎湯調下 毒氣入腹衝心
作痛吐涎者降氣湯下養正丹或用吳茱萸

製炒煎熟入生薑汁主之 寒多者越婢湯
小續命湯加生薑汁 熱多者人參羌活散
敗毒散並加木瓜或追風毒剉散加大黃
風多者小續命湯加獨活或越婢湯 濕多
者除濕湯五苓散 痰多者除濕湯下白圓
子挾寒者養正丹 煩燥者竹瀝湯或紫雪
大便秘者脾約圓神功圓麻仁圓或五積散
加大黃 風毒腫痛排風湯檳榔散 筋急
掣痛南木香煎湯調乳香趁痛散 又法香

蘇散三錢川練子兩箇取皮肉剉新瓦上焙
降真香碎三節和之新汲水煎空心熱服脚
氣風癩痛痒皆作效更加川芎
脚氣證候真與傷寒無異或發熱頭痛或身
體冷疼或寒熱往來或自汗惡風或無汗惡
寒或大小便秘澁腹痛下利胃滿氣短怔忡
煩悶嘔噦涎沫惡聞食臭大類傷寒但卒起
腿脚屈弱頑痺肢節攣急酸疼或歷節及踝
脛間焮然赤腫爲異耳傷寒傳足六經脚氣

亦傳足六經在太陽則頭痛項強腰背酸重
在陽明則口燥鼻乾惡熱譫語在少陽則耳
聾口苦脅脇俱疼在太陰則胃腹滿痞肢體
浮腫在少陰則咳喘恐惕咽痛面鰲在厥陰
則癱緩筋攣陰器脹痛六經所傳又有合病
併病外證與傷寒並同凡遇發熱煩燥大便
不通嘔噦痰涎而惡食者須審問之脈浮而
弦者起於風風則汗而愈濡而弱者起於濕
濕則滲而愈洪而數者起於熱熱則下而愈

遲而澁者起於寒寒則溫而愈風寒暑濕證
狀不同然風爲走注寒爲疼痛暑爲熱煩濕
爲重著必有可驗之迹治法總要貴乎疎導
大便但不可過劑其補湯淋洗則醫家之大
戒也雖然腳氣漸入頓深非藥力相接不可
也治之亦當究其源或因丹砂發動則爲之
解丹砂或因飲食釀成則爲之消飲食氣觸
而作者與之調氣續生他病者則以他病方
藥理之所患氣實而死未有服藥致虛而殂

甚者喘嗽上氣衝築心疼嘔吐無已腹脅脹
滿臍下頑痺不仁最爲惡候大槩然爾所謂
寒則溫之熱則寒之在表則散在裏則下太
虛氣乏扶養其中是爲不刊之法 千金製
法食鹽并竈中灰等和炒熱重帛盛而熨
傷寒傳經之邪病至厥陰其脉微帶浮緩之
狀是則脾氣將復邪無所容必寒熱作而得
汗解若尺寸俱沉短此爲毒氣入臟土敗木
賊脾受肝邪必有囊縮舌卷耳聾不知人之

證當急下之五救其一或脉來弦亦賊邪也
許學士云輕手脉浮爲在表表實浮而兼有
力但浮無力表中虛自汗惡風常淅淅重手
脉沉爲在裏裏實脉沉來有力重手無力大
而虛此是裏虛理端的氣口緊盛食必傷人
迎緊盛寒邪熾跌陽胃脉定死生大谿腎脉
爲根蒂 治熱入血室血熱留滯小柴胡湯
加生地黄治血結胃按之痛活人書海蛤散
蓋血聚臚中則小腸必壅小便通則胃次之

血散矣 凡小便或赤或澀皆其裏有熱也

發熱

發熱初陽冷必憎陽明發熱汗之形少陽
脈細仍兼嘔反熱而沉屬腎經
發熱多屬三陽太陰厥陰皆不發熱惟少陰
有反熱二證然少陰發熱終是脈沉或下利
手足冷也三陽發熱何以明之太陽發熱則
惡寒陽明發熱則自汗少陽發熱必有乾嘔
之證矣熱邪在表病屬太陽此表熱而裏不

熱也熱邪在裏病屬陽明此裏熱盛而達於
表也若表證未罷邪氣傳裏裏未作實病在
表證裏證之間若傳經之邪至於少陽病在
二陽三陰之間其熱皆輕於純在表純在裏
者也然而陽明裏實熱盛固當攻之以寒太
陽風寒外搏陰盛心寒雖熱尤當溫散少陽
和解雖屬小柴胡似熱不渴者又當加桂是
不可無以權之雖然傷寒發熱病之常也脈
陰陽俱虛熱不止者仆下利發熱者殂汗後

復熱其脉躁疾爲陰陽交此皆不治之證其可例視之乎 太陽發熱惡風有汗桂枝湯惡寒無汗麻黃湯 吐利發熱惡寒是爲霍亂發熱而渴自汗不惡寒是爲風溫若誤汗之必身灼熱煩渴獨語各有本條 陽明發熱汗出脉實調胃承氣湯脉浮桂枝湯汗多者胃汁乾急下之用大承氣湯 少陽發熱脉細而嘔小柴胡湯 少陰發熱有二證脉沉發熱者麻黃細辛附子湯若下利厥逆裏寒外熱脉不出者通脉四逆湯 身熱而不渴則爲表熱小柴胡湯加桂身熱而燥渴則爲裏熱白虎加人參湯 無表裏證發熱七八日脉雖浮數可大柴胡湯下之若下後脉數不解消穀易飢不大便則爲瘀血屬抵當湯

潮熱

熱潮屬胃下之和 大結胃家本例圖 咳逆利溏并表證勿攻 只用小柴胡

潮熱屬陽明一日一發日晡而作也若非日晡所發是謂其熱不潮蓋陽明旺於未申故尔惟屬陽明故潮熱爲可下之證苟其脉或弦或浮大便或溏或利小便艱澁外證猶有惡寒則其熱未全入府並不可下但以小柴胡和解之是必表證已退大便鞭結小便如常乃可攻也 日晡潮熱屬陽明經脉實可下證用小承氣湯大柴胡湯脉虛不可下者與桂枝湯 大結胃潮一證却屬太陽用大

陷胃湯 咳逆潮熱 大便溏利潮熱 表證潮熱並用小柴胡湯 腹滿不大便只用小承氣湯微利之勿令大泄 日晡潮熱甚者循衣摸床獨語如恠直視微喘脉弦者可治脉濇者不治脉不實不虛但用小柴胡湯冬陽明潮熱有時脉浮緊者無汗脉但浮必盜汗並用黃芩湯 寒熱 往來寒熱闔陰陽大小柴胡及桂薑結熱

心煩仍喜嘔渴而頭汗用之良

陽不足則先寒後熱陰不足則先熱後寒寒熱往來者陰陽相勝邪正交爭而作也蓋陽不足則陰邪出於表而與之爭故陰勝而爲寒陰不足則陽邪入於裏而與之爭故陽勝而爲熱若邪氣在半表半裏之間則外與陽爭而爲寒內與陰爭而爲熱出入無拘所以乍往乍來而間作也大抵邪居表多則多寒邪居裏多則多熱邪在半表半裏則寒熱相

半此又可以知其受病之處用藥固自有條然小柴胡湯最主寒熱寒多者加桂熱結者加大黃脈不甚實而大便澁者加枳殼寒熱相半只守本方是亦活法雖然寒熱之方來如波濤之洶湧其勢有不容遏者當遲之一二日候少定而圖之經所謂其盛者可待衰而已是又不可不知病至十餘日結熱在裏往來寒熱大柴胡湯下之心煩喜嘔胃脇滿不欲食寒熱往來

小柴胡湯或血氣弱腠理開邪正交爭痰嘔甚者二陳湯汗下後不嘔而渴頭汗出胃脇滿小便不利寒熱往來柴胡桂薑湯

寒熱似瘧

似瘧膀胱桂可醫清便不嘔半麻枝陽明實下浮須汗血室柴胡小者奇

似瘧一名瘧狀作止有時非若寒熱往來或踈或數而作止無定時也凡感冒之人忽覺毛寒股慄筋節搜攣百骸鼓撼嘔不欲食其

寒不可禦未幾復轉而發熱者此卽溫瘧不必謂瘧脉自弦或洪數或緊實或虛緩或刮瀋皆爲瘧狀但以外證別之用藥固有本條然小柴胡湯如前斟酌加減亦是活法雖然血虛能生寒熱敗血亦作寒熱陰陽相勝雖一證各有一方其間當以川芎爲佐太陽似瘧證脉洪浮與桂枝湯清便自可不嘔日一二發桂枝麻黃各半湯其脉微緩微浮則欲愈也陽明似瘧證煩熱汗出日

晡發熱脈虛浮與桂枝湯脈實與承氣湯
病人熱入血室其血必結如瘧狀者小柴胡
湯主之 瘧後寒熱或潮熱身瘧後昏沉條
諸瘧通用二陳湯熱多者加川芎前胡寒多
者加川芎草菓餘見溫瘧

熱多寒少

熱多寒少治膀胱不嘔清便各半湯尺脈
若遲爲血少脈皆微弱號無陽
熱多寒少陽乘陰也其間三證並屬太陽脈

浮緊者可汗或遲或弱皆和解之清便自可
謂大便如常也

不嘔清便自可桂枝麻黃各半湯 尺脈遲
血少者先以小建中加黃耆以養血候脈不
遲卽以小柴胡桂枝二越婢一輩主之 諸
脈皆微弱無陽者用桂枝二越婢一湯不可
正汗

汗後寒熱

汗餘寒熱脈中論若見憎寒法用溫沉實

當攻浮再表風溫誤汗熱而煩

汗後寒熱邪氣未解徹也脉浮洪者邪在太陽法當再汗脉沉實者邪在陽明又須下之若厥陰餘熱加以下利厥逆惡寒四逆湯溫之無疑矣

憎寒者屬厥陰大汗出熱不去拘急體疼下利厥逆四逆湯溫之 脉沉實者屬陽明得汗後如瘧狀日晡而發大柴胡湯承氣湯下之若只惡寒則爲虛用芍藥甘草附子湯只

發熱則爲實大承氣湯 脉浮洪者屬太陽汗後寒熱桂枝二麻黃一湯 風溫不惡寒

若誤發汗必身灼熱煩渴獨語萎蕤湯 溫

家汗後大熱脉躁名陰陽交不治熱病已得汗而脉躁盛亦不治詳見陰陽交條有再汗再下之劑

下後有熱勞食復附

下於汗後致傷榮陰氣衰今熱又生瘥後熱名勞食復心中痛者豉枳平

大汗則損氣損氣則陽微脉虛而惡寒大下則傷血傷血則陰弱脉濇而發熱誤汗誤下亦猶是尔且陰以陽為主陽以陰為根血陰也氣陽也血非氣使不能自行令也下之亡陽是陽不主陰矣陰無所主而寒氣搏之所以脉濇寒極血虛所以發熱方七之劑其可輕乎

汗後陽微而惡寒可四逆湯或用芍藥甘草附子湯下後陰弱而發熱是為內熱可葶

藜苦酒湯

瘥後勞復發熱小柴胡湯枳實

梔子湯豶鼠糞湯

即雄鼠糞兩頭尖者

若脉浮則汗之

用麻黃湯葱白湯脉實則下之用承氣湯大

柴胡湯證治論瘥後餘熱用柴胡桂枝湯下

利腹鳴痞滿者牛薑瀉心湯小便不利麥門

冬湯交接勞復外腎腫腹中絞痛竹皮湯

勞役心力復熱用枳實梔子湯小柴胡湯餘

見陰陽易條瘥後食復發熱枳實梔子湯

加大黃粥飯傷飽或食肉或餅脯硬物不消

皆復熱也傷食必有痞滿噎氣吞酸腹鳴下利等證可與生薑瀉心湯 下後身熱而心中結痛梔子湯 飲酒復熱有本條

惡風

惡風汗出怯風吹脈緩而浮但解肌發汗亡陽成漏者溫經之法莫遲疑

惡風者見風則怯密室之中無所惡也風傷衛氣衛虛則腠理不密由是而汗出焉證雖屬表不可發汗但微解肌而已衛者陽也惡

風陽證也所以表怯而惡風蓋亦陽虛故陰邪出而乘之特其病在皮膚邪氣尚淺耳

桂枝湯桂枝加葛根湯主之壯熱者與參蘇飲 發汗大過衛虛亡陽汗漏不止而惡風者法當溫經用桂枝附子湯或小便難四肢微急難以屈伸並用桂枝附子湯 身熱惡風項強脅滿手足溫而渴小柴胡湯 風濕惡風不欲去衣骨節間煩疼掣痛不得屈伸汗出短氣小便不利或身微腫甘草附子湯

惡寒

惡寒發熱屬於陽陰病憎寒體自涼淨數桂枝并越婢沉而細者理中湯

惡寒者不見風而怯寒身雖灼熱亦不欲去衣被也此陰邪出而乘陽致之蓋寒傷榮氣榮行脉中居衛之下是為表邪已深法當發汗間有一二自汗則其表已虛但與解肌可也然而發熱惡寒者屬陽無熱惡寒者屬陰在陽則發汗在陰則溫裏常須識之大要惡

寒皆為表證或裏證悉具而微惡寒者見表猶未解當先解表俟不惡寒然後可以攻裏

惡寒家不可近火氣及過覆衣被則寒熱相傳脉道沈伏愈令寒不可遏但服和乎等劑散之發於陽者脉浮數桂枝湯桂枝二越婢

一湯麻黃湯青龍湯酌量輕重用 太陽證

發熱或未發熱皆惡寒有汗用桂枝湯無汗用麻黃湯 陽明證固當下之惟惡寒中寒者係與太陽合病在經屬表可汗用麻黃湯若脉遲汗多微惡寒者表未解也雖陽明病

可桂枝湯 少陽證頭汗出微惡寒小柴胡湯加桂 發熱微惡寒柴胡桂枝湯 汗後反惡寒者爲虛芍藥甘草附子湯 下後復發其汗心下痞而惡寒者表未解也當先解表用桂枝湯表解然後攻痞用三黃瀉心湯入生薑汁 發於陰者脈沉細理中湯四逆湯少陰證脈沉細用理中湯四逆湯若下利惡寒而蹇手足溫者可治用小建中湯若惡寒而蹇時時自煩不欲厚衣可大柴胡湯

下之

背惡寒

背上憎寒值少陰口和附子本條尋舌乾口躁三陽合白虎湯中好酌斟

背負陽腹抱陰背寒者陽弱也然背寒有陰陽二證何以別之少陰一證以其陰寒氣盛不能消耗津液故口中和三陽合病以其陽氣陷入津液爲之乾焦故舌乾口燥陰寒陽熱識者以口中潤燥推之思過半矣

口中和而背惡寒者屬少陰附子湯 舌乾
口燥內有熱證口中不仁而背惡寒者爲三
陽合病白虎湯經云腹滿身重面垢譫語遺
尿口中不仁爲三陽合病白虎加人參湯主
之若自汗者亦用白虎加人參湯 又陽明
證背微惡寒無大熱口中燥渴者亦用白虎
加人參湯 中暑亦有背惡寒證但面垢自
汗脈虛而伏自有本條 凡脾胃素虛之人
遇暑月間或飲冷水或多喫茶或餐雪菓之

屬易致生冷壞脾寒氣蓄聚陰上乘陽故寒
從背起冷如掌大此當以溫藥主之

四逆

四逆須將腎證詳病家手足但微涼枳柴
芍藥傳經劑邪中陰經四逆湯

手足不溫謂之四逆陰經之邪主之太陰受
病手足自溫傳至少陰則有手足四逆之證
四逆之與厥冷實相遠也或曰均是四逆耳
而四逆湯散一寒一熱用藥何不類耶蓋手

足自熱而至溫由溫而至四逆是傳經之邪非虛寒之候也四逆散主之若得病以來手足不溫便成厥逆此則陰經受邪陽氣之不足也可以四逆湯溫之臨診要當審此雖然吐利煩燥惡見四逆四逆下利惡寒而踈並屬少陰又為不治之診故併及之少陰四逆其人或欬或悸或小便不利或腹中痛滿或泄利下重並用四逆散初病以來厥冷四逆即川四逆湯濕溫兩足脛逆冷有本

條

厥

冷厥初來厥有源沉遲而弱冷常存熱深發厥初身熱沉滑時手指爪溫

陽氣伏藏陰氣越出陰陽不相順接所以厥也其手足逆冷之證乎蓋諸陽會於四末陽微而為陰所勝初病便厥者是為冷厥其脈沉遲按之則弱醒醒而靜惡寒引衣足多攣臥或身上粟形或下利清穀也熱伏於內先

熱而後厥者是爲熱厥脈必沉滑按之則數
昏塞狂言發渴引飲露手揭衣或燥不得眠
或大小便不利也外證皆可驗焉若先厥而
後得熱是則陰邪退而陽氣復矣傷寒熱多
厥少其病當愈厥多熱少其病則進下利發
厥一條亦以厥者復熱爲有瘳熱者復厥爲
已甚蓋下虛則厥陰實使之陽長陰消其可
也雖然傷寒血證亦有四肢發厥以至昏迷
悶絕者此又不可不知至若少陰下利惡寒

而拳手足厥冷與夫臟厥一證皆爲不治之
診厥之爲厥可無辯乎 冷厥初病便作四
肢逆冷足攣惡寒引衣自蓋不渴大小便滑
泄外證默默而醒四逆湯理中湯通脈四逆
湯白通加豬膽湯當歸四逆加茱萸生薑湯
可選用 又痰厥氣厥腎厥用易簡芎辛湯
熱厥初病身熱然後發厥其人畏熱揚手擲
足煩燥飲水頭汗大便秘小便赤佛鬱昏憤
蓋當下失下血氣不通故四肢逆冷所謂熱

深則厥深所謂下證悉具而見厥逆者此也
與大承氣湯大柴胡湯或白虎湯 熱厥與
冷厥相類但指爪時溫爲異耳若疑似未明
且以四順圓試之陽厥則有熱陰厥則無熱
寒熱而厥者一手或兩手無脈面色冒昧不
澤急與五味子湯并麻黃細辛甘草湯人參
調血通脈可以爲佐服無汗解則生投藥無
汗或脈不至者不治 水氣厥者心下怔忡
伏苓甘草湯 邪氣結胃中而厥者脈乍緊

乍結心煩滿飢不欲食瓜蒂散吐之 臟厥
者七八日逆冷下利發躁無時暫安不治
痰飲厥逆眩運少與三生飲

頭痛

頭疼惡冷太陽先惡熱陽明膽絛弦濕鼻
塞兮痰膈滿厥陰乾嘔吐清涎

頭痛屬三陽陽明少陽皆有之而太陽則專
主是也太陽專主頭痛則頭痛之屬表證者
居多陽明少陽又次而輕耳三陰經絡上不

至頭故無頭痛惟厥陰循喉嚨之後上連目
系頂顛有頭痛乾嘔吐涎吳茱萸湯一證却
無身熱亦與陽證不同也雖然太陰少陰其
經從足至胷並無頭疼是固然爾然風溫病
在少陰濕溫病在太陰而頭反痛至於陰毒
亦然是又某病則有某證脈絡相通不可拘
也若夫頭痛劇甚入連於腦手足俱寒此則
真痛神丹在手其能救乎太陽頭疼發熱惡
寒無汗麻黃湯有汗桂枝湯已汗未汗頭痛

如破連鬚葱白湯服之痛不止葛根葱白湯
陽明頭疼不惡寒反惡熱胃實氣實攻於頭
也少與調胃承氣湯少陽頭疼發熱脈弦
細小柴胡湯濕頭疼鼻塞頭中寒濕也瓜
蒂末納鼻中黃水出則愈痰涎頭疼胷膈
滿發脈寒熱脈緊不大瓜蒂散吐之可以痰
證條參驗厥陰頭疼乾嘔涎沫吳茱萸湯
若脈微浮爲欲愈脾氣將復邪無所容不愈用桂枝湯
小建中湯若發熱似瘧亦欲愈桂枝麻黃各

半湯諸頭疼無熱如聖餅用生薑葱白煎湯下

項強

項強葛根主表強表虛桂葛去麻黃結胃須進陷胃劑桂入栝萸瘥反張

傷寒頸項強急太陽表證也當發散而解之若誤下太陽邪氣乘虛入裏則為結胃項強太陽病項背強無汗惡風為表實葛根湯項背強發熱汗出惡風為表虛桂枝湯加葛根

不加麻黃 誤下太陽結胃項強大陷胃圓

太陽傷風復感寒濕身熱足寒頭搖口噤頸

項強背反張其脉沉遲此為發瘥桂枝加栝

萸根湯 項強脇下滿小柴胡湯

咽痛

咽疼陽毒發成斑肢冷咽瘡腎證看脉緊無陽咽亦痛脉微下利腎傷寒

咽喉不利或痛或瘡穀不入而嘔吐者毒氣上衝所致也陽毒必然發斑少陰四肢必冷

其有下利者可與甘桔湯半夏散入甘草生薑佐之其不下利或小便赤而去衣者可與甘桔湯八玄參枳殼使大便順導則黑臭之毒泄矣續以甘草生薑煎湯調之甘草生薑解其毒也腎病咽痛下利身猶熱者未可用四順湯且與黃連龍骨湯卽黃連雞子湯去雞子加龍骨

陽毒咽痛發斑唾膿血脈洪數用藥有本條少陰咽痛咽瘡脈沉遲厥冷或吐利又陰陽

脈俱緊反自汗爲無陽法當咽痛而後吐利亦屬少陰並不可汗下熏熨汗出以藁本粉傅之咽痛用甘桔湯猪膚湯若沉冷甚者半夏散通脈四逆去芍藥加北極與之咽痛通用甘桔湯上焦壅熱加枳殼北前胡腎傷寒一證乃非時暴寒中人伏於少陰之經頭疼腰痛其脈微弱初咽痛似傷寒次必下利非咽閉之比咽痛半夏桂甘湯卽半夏散是也下利四逆湯或四順湯主之證治論

口瘡赤爛用蜜浸黃蘗一宿取汁含嚙熱甚
升麻六物湯咽中閉塞烏扇湯 傷寒六七
日大下之寸脉沉遲尺脉不至咽喉不利唾
膿血手足厥利不止者難治麻黃升麻湯

身痛

身疼浮緊太陽臨自利肝并腎帶沉中濕
毒陰與風濕汗餘霍亂本條尋

局方大柴胡證云邪結在裏大便秘澁心腹
痛鞭者可服若身體疼痛是表證未解不可

與之然則身體疼痛不脉沉不自利太陽之
表證明矣其或自利脉沉此則陰證之身痛
臟家之裏病云

身痛大抵多是表證

太陽身痛脉浮緊無汗麻黃湯以汗之或尺
脉遲者血不足也先用小建中湯以養之候
其尺脉浮即用麻黃湯太陽病七八日脉細
惡寒爲陰陽俱虛吐汗下並不可至再其人
素無熱可芍藥甘草附子湯素有熱可黃耆
建中湯 厥陰少陰身痛其脉沉必自利四

逆湯真武湯附子湯 中濕一身盡痛不可
汗下但利小便有本條 陰毒身痛如被杖
腹中絞痛脉沉而疾有本條 風濕一身痛
重但微汗不可大發汗有本條 發汗後身
痛脉沉遲桂枝加芍藥人參湯汗後身痛爲
寒邪在表脉沉遲爲在裏用芍藥入榮人參
安和真氣或用黃耆建中湯又汗後霍亂身
痛不休少與桂枝湯

腹痛脹

腹痛腎兮通脉湯脾兼表證桂加黃實疼
便結虛疼利脹則陳皮梗夏良

陰邪在裏陽邪入裏與正氣搏則爲腹痛所
以痛者有異焉脉實腹滿而大便秘者實痛
也脉虛腸鳴而大便泄者虛痛也陰陽異證
用藥不同大抵痛爲邪氣實法當疏利陰受
病則金液丹養正丹輩溫而利之 少陰腹
痛四逆或欬或悸或小便不利或泄利下重
四逆散下利清穀脉微欲絕通脉四逆湯腹

痛小便不利用真武湯 誤下太陽因而腹
滿時痛是有表復有裏爲太陰太陽俱病用
桂枝加芍藥湯痛甚桂枝加大黃湯 實痛
者關脈實煩燥腹滿大便秘結桂枝加大黃
湯小承氣湯胃中熱胃中邪氣腹痛欲嘔吐
則用黃連湯 虛痛者寸脈濇尺脈弦腸鳴
泄利先與小建中湯不瘥小柴胡去黃芩加
芍藥與之易簡用建中湯加遠志腹中冷痛
四肢厥逆用薑附湯 腹脹者陰陽不和也

桔梗半夏湯最良

奔豚動氣

奔豚動氣數般方左右高伍細揣量玄朮
理中并用桂不堪汗下例中詳

動氣者臟氣不調築觸跳動隨臟所主而形
見於臍之左右上下也大抵真氣內虛水結
不散氣與之搏卽發奔豚以其走痛衝突如
豚之奔雖有發表攻裏之證汗之下之並不
可也然而不言當臍動氣者何耶蓋胃爲中

州以主津液。施汗下必先動脾。是以不言而喻也。舉此動氣非問證。何以知之。然則調理傷寒。貴乎纖悉。問證動氣諸藥詳見不可汗不可下條例中。太陽病下之後。氣上衝者。桂枝湯。若不上衝。不可與也。若從小腹上衝於心。桂枝加枳湯。發汗後。臍下悸者。欲作奔豚。伏苓桂甘大棗湯。動氣通用。理中湯。去朮加桂。蓋桂利小便。泄奔豚故也。奔豚一名腎氣。白朮燥腎閉。氣是以去之。吐汗下後。心下逆滿。氣上衝。

胃起卽頭眩。其脉沉緊。誤汗之則動經。故其身振振搖動。伏苓桂甘白朮湯主之。此方用白朮者。蓋以誤汗動經。故用白朮閉其汗也。奔豚動氣。脉沉弱。肢體冷。可與養正丹。動氣證治論。用柴胡桂枝湯。

腹滿

腹滿。脾家及胃家三陽合病。口頑麻入邪。吐汗下之後。腎證便堅。承氣加。

腹滿多屬太陰。蓋脾爲中央土。所以主腹滿。

之候腹中常滿者裏實而可下時滿時減者裏虛不可下當以溫藥和之其有吐汗下後因成腹滿者此則邪氣乘虛而入或踈利或溫散或湧吐條例又不同焉審其邪氣之所起知其邪氣之所在斯可矣雖然太陰主腹滿固也陽熱爲邪必腹滿而咽乾陰寒爲邪必腹滿吐食而自利一熱一寒又不可以無別若夫腹滿而泄難以有瘳太陰腹滿吐食不可下枳實理中丸主之誤

下太陽因而腹滿時痛爲太陰太陽俱病桂枝大黃湯重者桂枝加大黃湯陽明發熱腹滿微喘口苦咽乾或不大便譫語火迫者亦有此證並小柴胡湯噦而小便難加伏苓又陽明腹大滿不大便小承氣湯微下之陽明脉遲腹滿時喘潮熱亦用小承氣湯發黃證有本條三陽合病腹滿身重難以轉側譫語口中不仁少與白虎湯吐後腹脹滿常不減者胃中之邪下傳入胃擁而爲實也

少與調胃承氣湯 汗後腹脹滿者胃虛而
不能敷布諸氣壅滯也厚朴生薑半夏人參
甘草湯若滿而痛則小承氣湯微下之 妄
下後腹脹滿心煩而臥起不安者表邪乘虛
而入鬱於胃中也梔子厚朴湯 少陰病六
七日腹脹滿不大便承氣湯急下之 腹脹
通用桔梗半夏湯 腹皮痛者脾不勝水故
水與氣搏於皮肉之間觀其腸鳴漉漉可知
矣小半夏茯苓湯加官桂伏苓 腹脹滿而

短氣者邪在裏而爲實也腹滿滿而短氣者
邪在裏而爲虛也見氣短條
腹滿用藥皆去白朮朮溫燥而閉氣也

胃脇滿

胃滿多將表證看半居表裏脇間堅虛煩
客熱須梔豉瓜蒂拈來吐冷涎

胃滿者胃膈間氣塞滿悶非心下滿也脇滿
者脇肋下氣脹填滿非腹中滿也胃滿多帶
表證脇滿多在半表半裏之間 大陽病下

後脈促胃滿桂枝去芍藥湯病在衛氣芍藥
入榮其性利故去之 陽明喘而胃滿此猶
帶表證不可下可與麻黃湯 胃脇俱滿或
脇下鞭痛此半表半裏之證並用小柴胡湯
和解之 胃中虛煩客熱或經汗下後煩熱
窒塞氣逆搶心並梔子豉湯吐之若氣乏則
與梔子甘草湯若嘔則與梔子生薑湯 胃
中痰實宿寒瓜蒂散吐之 又陽明病心下
鞭滿不可下下之遂利不止而死法當湧吐

詳見結胃解題此則胃中虛而氣痞也或用
半夏瀉心湯生薑瀉心湯 孫用和云胃滿
則諸瀉心湯審證用 邪氣留於胃中法當
湧吐其高者因而越之是爾然有吐汗下後
邪氣乘虛入而爲煩是則胃中客熱以梔子
豉湯吐之此吐劑之輕者也不經發汗吐下
邪氣留聚煩滿痰實是則胃中宿寒以瓜蒂
散吐之此吐劑之重者也均之爲吐又當權
衡

脇疼

脇疼多屬少陽家燥糞陽明並小柴裏木
痞堅須十棗陰筋引痛臟中乖
脇肋痛滿者邪氣在半表半裏之間也邪方
傳裏未留爲實氣鬱不行法當和解若夫裏
水痛堅非下之不可也 少陽病脇痛耳聾
寒熱乾嘔或脇下堅滿並用小柴胡湯和解
之 陽明病不解轉入少陽脇下堅滿乾嘔
小柴胡湯又陽明燥糞不大便脇下堅滿舌

上胎滑小柴胡湯

太陽病咳嗽乾嘔微利

心下痞鞭引脇下痛身涼汗出或時頭疼此
爲表解裏有水十棗湯下之 病者脇下痛
素有痞積在於臍傍引小腹入陰筋俱作痛
此爲臟結不治

自汗

自汗傷風暑不消風溫風濕衛難調無陽
霍亂并柔痊更與陽明共九條
衛氣所以密腠理而固津液也衛爲邪所干

不能護衛於是而汗出焉寒傷榮氣汗獨無之惟風暑濕之邪有干於衛皆爲自汗之證也若夫寒已入裏寒極生熱熱則榮衛通腠理開又爲陽明自汗是其熱越而汗出矣治法各自有條然而汗出以至髮潤或汗出如油或汗出如珠凝而不流此皆不救他病見之亦然

太陽傷風自汗脉浮緩者桂枝湯汗出而渴或小便難者五苓散不渴者伏苓甘草湯自

汗小便數者勿用桂枝惟芍藥甘草湯主之自汗小便不數心煩微惡寒脚攣急桂枝附子湯加人參參以調榮脚必伸也 大陽中暑汗出惡寒身熱而渴香薷散白虎湯或用小柴胡湯 風溫多眠喘息自汗若誤汗之必身灼熱讖語並用萎蕤湯 風濕額上自汗關節痛重恒微解肌通用敗毒散餘見衛本條不和者臟無他病時發熱自汗出桂枝湯亡陽者太陽證發汗多漏不止而惡風用桂

枝加附子湯又少陰證尺寸脈緊反有汗出
額上手背冷汗爲亡陽主咽痛吐利四肢疼
急厥逆惡寒用四逆湯汗多不止溫粉撲之
若汗不止惡風煩燥不得卧先服防風白朮
牡礪湯次服小建中湯咽痛通用甘桔湯猪
膚湯霍亂吐利汗出發熱惡寒手足拘急
厥冷四逆湯又中暑霍亂煩渴香薷散柔
痙大陽病身項反張口噤瘈縱發熱汗出小
續命湯陽明汗多而渴發熱讖語大便硬

調胃承氣湯若小便自利而汗出者爲津液
少不可攻但用蜜導若汗多者胃汁乾急下
大承氣湯陽明汗多而渴勿用五苓散陽
明反無汗脈浮而喘麻黃湯

無汗

無汗因寒中太陽三陰剛產證中詳冬陽
明病兼陰易七例推尋各有方

腠理爲風暑濕所干皆令自汗惟寒邪中經
腠理密緻則津液內滲獨無汗焉此特傷寒

在表然耳若陰病若水飲與夫亡陽久虛亦皆無汗隨證各自有條惟熱病脈燥盛而不汗此陽亢也當汗無汗與麻黃湯三數劑而汗不出者此亦不可活也知其可進則進知其不可則已之君請擇斯二者 小柴胡湯證云陰病不得有汗蓋三陰證本無汗其或有汗者亡陽也 冬陽明脈浮緊者必發潮熱脈但浮者必有盜汗黃芩湯主之 盜汗者邪氣方侵於裏尚連於表睡則衛氣行

裏而表陽不緻因其表陽不緻故津液得泄覺則氣散而週於表腠理閉焉汗復止也是之謂盜汗此邪在半表半裏之間法當和表餘證無汗治法各有本條

頭汗出

頭汗諸陽氣上蒸身黃尿秘引漿頻心忪水結讖言血表裏柴胡小是珍

諸陽之經循於頭三陰則至頸而還也裏虛表實腠理密緻熱不得越故陽氣上騰津液

上湊而汗出於頭抑亦胞虛內涸使然耳夫裏虛則不可下內涸則不可汗頭汗之證無所謂表邪汗之斷不可也若夫陽明熱入血室燥糞譏語候其過經利之以小承氣湯是可無以權之哉大抵寒濕相搏與夫邪在半表半裏之間則有頭汗設或小便不利內外關格頭汗則爲陽脫誤下濕家額上汗出而喘或小便不利大便自利亦爲陽脫二者皆不可活臨診又當審斯 癸黃證頭汗及頸

而止小便難引水漿此受濕也茵陳湯五苓散主之 水結胃證心下忪滿無大熱頭汗出小半夏加茯苓湯 譚言頭汗是爲血熱病屬陽明可承氣湯若心中懊懣而頭汗者梔子豉湯 半在表半在裏及餘證並小柴胡湯寒熱往來微惡寒爲表脇下滿大便堅爲裏 汗下後胃滿微結寒熱心煩嘔渴爲表未解柴胡桂枝乾薑湯或柴胡桂枝湯手足汗

手足如何汗不休胃中熱聚液旁流熱家
燥糞爲讖語寒證難教水穀留
手足汗者熱聚於胃而津液之旁達也亦有
寒聚於胃致之挾寒則水穀不分蘊熱則燥
糞讖語

陽明病手足漿漿汗出讖語大便難此熱證
也與承氣湯下之

陽明中寒不能食小便不利手足濺然汗出
大便初鞭後溏水穀不分則不可下少與理

中湯

不得汗

汗之不得亦須蒸躁盛還無未必生身痒
浮遲惟各半陽明虛證若虫行

傷寒欲得汗與麻黃湯數劑而汗不出者不
治熱病脉躁盛而不得汗諸陽之極亦不治
二者蓋真病也亦有寒熱而厥忽兩手或一
手無脉是猶重陰欲雨之時必濺濺然大汗
而解其或投藥無汗而脉不至者亦不可活

也是容易談哉雖然諸虛少血津液中
乾亦不能作汗病人有挾宿恙如痰飲癥癖
之類又隔汗而不能出也少血者養血以汗
之痰癖者開關散氣以汗之是爲活法若夫
汗出如油喘而不休未有能生者也
服藥不得汗當用蒸法燒地令熱去其火以
水洒之用桃栢葉蠶沙糠麩夾和鋪地厚三
寸許上鋪席令病人仰臥衣被覆之片時周
身至脚心皆汗出乃用溫粉撲卽移上床

身痒脉浮遲爲氣虛亡陽不能作汗桂枝麻
黃各半湯主之 湯明反無汗皮中如虫行
以久虛也木附湯黃耆建中湯 凡發汗須
令上下周遍身上衣被如常腰以下厚蓋之
若蓋覆不周汗出不匝不流必致肢體攣搐
可與牛蒡根散

不可汗

不堪汗者脉微遲溫濕虛煩壞病推經水
忽來兼失血臍間動氣並如之

病在表而脉浮者可汗表證悉具若發渴若脉不浮是表猶帶裏也未可汗之傷寒不可汗條例最多其可汗者大抵脉證全在表也表固可汗然汗之太早太過或者津液泄而變生焉至於當下而誤汗則爲亡陽爲譏語爲下厥上竭等證其害人又速耳設或誤汗則真武湯以救解之羸甚者去芍藥有熱者去附子吁此救兵也謹之謹之表寒裏病則不消裏病表熱者雖無陽證可以小辛之劑微汗而溫散之

脉微弱爲亡陽不可汗用桂枝二越婢一湯尺脉遲爲血少榮氣不足也不可發汗先與黃耆建中湯以養血候其脉不遲卽以小柴胡湯桂枝二越婢一湯和解之風溫濕溫各有本條虛煩似傷寒却不惡寒身不疼脉不緊並不可汗下可竹葉湯或小柴胡湯壞病者吐汗下溫不解知犯何逆以法治之並不可汗可小柴胡加減經水適下表裏俱虛不可汗小柴胡湯主之衄血下血雖脉

浮緊無汗然衄者欲愈下者亦欲愈不愈則用桂枝湯但不可發汗 腹中左右上下動氣築觸並不可汗下證治論用柴胡桂枝湯動在左發汗則頭眩汗不止筋惕肉瞤爲逆先服防風白朮牡蠣湯汗止以建中湯與之動在右發汗則衄而渴心苦煩飲則吐先五苓散次竹葉湯動在上發汗則氣上衝心李根湯動在下發汗則心中大煩骨節煩疼頭痛目運入食卽吐先用大吉皮湯止吐次小

建中湯 下利清穀用理中湯或大便不通者皆不可汗 惡寒脉浮此爲表證若渴則邪欲入裏不可汗 咽乾喉塞亡血淋家衄家瘡家動氣並不可汗證治論皆用小柴胡湯厥逆不可汗當歸四逆湯 不可下

不可攻浮及細虛惡寒嘔吐與之俱小便自利并清少有表仍兼失氣無

病在裏而脉實者可下裏證悉具若惡寒若

脉不實是裏猶帶表也未可下之傷寒不可
下條例最多其可下者大抵脉證全在裏也
裏固可下然下之太早太過或者水穀脫而
變生焉至於當汗而誤下則爲痞氣爲懊懣
爲結胃等證其害人又速耳設或誤下則理
中湯丸以救解之或裏煩則少加烏梅或轉
指厥逆則兼與四逆湯輩吁此救兵也謹之
謹之 脉來細小固不可下若細小而牢緊
又可下也

脉浮病在表不可下結胃脉浮大不可下
脉細虛或遲緩或尺部瀆弱此凡皆爲血氣
衰不可下也 惡寒者表之虛證雖陽明惡
寒則與太陽合病屬表可汗不可下若少陰
證惡寒則溫之 嘔吐者雖有陽明證謹不
可下小柴胡加生薑主之 小便自利汗出
者津液竭糞雖硬屬陽明但用蜜導而出也
猪膽汁亦可導也 脾約證大便堅小便數
者枳實脾約丸 大便堅小便清者熱不在

裏雖不大便不可下可桂枝湯汗之少陰
證小便白為下焦虛寒用四逆湯大便堅
小便少者津液還入胃必先鞭後溏不久自
出惟小便如常乃可下之有表證脈帶浮
或惡寒或猶生寒熱並不可下不轉失氣
謂不下泄也不下泄則先鞭後溏不可下大
抵陽明躁糞欲下之先與小承氣湯若轉失
氣則必先溏後鞭更進一劑不轉失氣則止
又陽明讖語潮熱脈疾與小承氣湯不轉失

氣則與小柴胡湯若次日又不大便而脈濇
則為裏虛黃耆建中湯主之凡陽證而脈濇
謹不可下頭汗出為津液少胞中虛不可
下唯陽明讖語血熱頭汗則可下諸虛少
血厥逆喉閉嘔吐亡陽陰實動氣皆不可下
虛家附子湯厥逆當歸四逆湯咽喉閉塞烏
扇湯嘔吐小半夏加吉皮湯無陽陰實而大
便鞭者下之必清穀腹滿但用蜜導左動
氣下之則腹滿拘急氣愈動身雖熱反欲拳

先甘草乾薑湯次小建中湯 右動氣下之
則津液竭咽鼻乾頭眩心悸竹葉湯 上動
氣下之則握掌熱煩汗出欲灌水竹葉湯
下動氣下之則腹滿清穀心痞頭眩甘草瀉
心湯

懊懣

懣平仄
兩音

懊懣心堅用陷胷舌間胎白豉梔供發黃
須與茵陳輩燥糞陽明承氣攻
懊懣者懊惱鬱悶之狀蓋由表證誤下正氣

內虛於是客氣乘虛入而動膈煩鬱微疼特
未至結胷之甚也由懊懣而結胷亦不難矣
短氣煩燥胷中懊懣心下因鞭則爲結胷用
陷胷湯 舌上白胎虛煩不得眠心下懊懣
或飢不能食頭汗出此邪熱鬱於胷中也並
梔子豉湯吐之 陽明病下之後懊懣而煩
胃中有燥糞此熱結於胃也承氣湯攻之
陽明無汗小便不利心中懊懣者必發黃用
茵陳湯是則胷中邪熱前後二部俱泄之也

痞

痞滿關沉痛不侵關浮肝熱用連芩惡寒
勿下先投桂痞利餘糧及瀉心

當汗誤下或病屬陰而反下之輕則為痞其
狀心下滿而不痛按之則濡是其虛邪留滯
故但滿而不痛也通用枳殼桃梗最良若欲
攻之亦須表證已解則可矣

痞才關脉多沉枳實理中丸半夏瀉心湯主
之桔梗枳殼湯尤妙 關脉浮而痞此為肝

熱用三黃湯瀉其肝若或惡寒汗出三黃湯
加附子名附子瀉心湯服湯後痞不去煩渴
小便不利五苓散主之 下後復汗心下痞
而惡寒者表未解也不可攻痞當先與桂枝
湯表解乃可攻痞用三黃湯表未解而心下
妨悶日支結用柴胡桂枝湯胃脇滿而微結
小柴胡加乾薑牡蠣湯表證在數下之協熱
而利心下痞鞭表裏俱病桂枝人參湯 下
利心下痞鞭乾噫食臭腹鳴甘草瀉心湯生

薑瀉心湯證治論用桂枝人參湯若利不止
則治下焦用赤石脂禹餘糧湯又不止卽利
小便用五苓散發熱汗出不解嘔吐下利
心中痞鞭用大柴胡湯下之此太陽證吐
汗下後噯氣痞鞭旋覆代赭湯若咳逆氣虛
則先用四逆湯胃寒則先用理中丸後用旋
覆代赭湯若虛煩心下痞薄氣上衝胃頭眩
經脉動身振搖茯苓桂枝白朮甘草湯十
棗湯證須是身涼表解脇疼而痞則可用

結胃

結胃痛硬滿其中大小隨名用陷胃熱實
多煩寒不熱水兼浮脉豈容攻

病發於陽而下之早或當汗而誤下外證項
強心下滿硬而痛者結胃也結胃痛硬是爲
實邪在裏法當下之若脉浮大若表證若水
氣戒不可下亦有不經下劑而心下鞭滿者
此又有可吐可下不同焉經曰病人手足厥
脉乍緊邪結胃中心滿而煩飢不入食當吐

之是則病在胃中故也經曰陽明病心下鞭滿不可下下之遂利不止而死是則邪氣自表傳裏留於心下未全爲實法當吐之故有此戒也審如是則經所謂高者因而越之是亦吐下界限判然天壤安可以結胃裏實例論之乎要之結胃治法人要審其邪氣所在而已矣或曰結胃證具加煩燥而不治者何此胃氣絕也胃氣旣絕安能布藥力以勝邪也哉凡病在胃膈者上腕澎湃痰壅氣促粥

藥不能下咽

結胃寸脉浮關尺皆沉或沉緊俱當下若脉浮大或有表證則先用小柴胡湯表已解卽下之 大結胃不按而痛胃連臍腹痛硬不可近大陷胃湯陷胃湯太峻合用者只陷胃丸 小結胃按之而痛只心下硬用小陷胃湯 熱實結胃懊懺煩渴心下痛少與大陷胃湯 寒實結胃無熱證三物白散枳實理中湯丸 水結胃心下怔忡頭汗出無大熱

小半夏加茯苓湯小柴胡去棗加牡蠣湯
臟結亦是結胃一種但舌上胎滑時時下利
陰筋引痛有本條 病人血結胃此熱入血
室見讖語條下膿血條 結胃先理其氣用
桔槔枳殼湯枳實理中湯渴者加栝蘆根證
治論諸藥不愈用增損理中丸凡結胃理氣
已平旋復大便澁者須利導之否則熱邪結
爲塊血 誤下後未成結胃急與理中湯救
解 陰毒陽毒隨氣逆上伏於胃中亦有結

胃痛硬之證治法詳見本條

氣短

氣短裏實熱來潮風濕洩難汗自流停水
心間并裏水太陽誤下結胃否

氣短者呼吸短促而不能相續是也其間呼
多吸少皆不救焉千金曰少氣不足以息者
危金匱曰短氣不足以息者實大抵短氣爲
實亦有表裏虛實之差心腹脹滿而短氣者
邪在裏而爲實也心腹濡滿而短氣者邪在

表而為寒也其或怔忡氣短此則心下停水
 致之體認不精其差千里信矣哉 氣短潮
 熱腹滿而喘此為外欲解而裏實小承氣湯
 大柴胡湯 風濕相搏汗出短氣小便不利
 惡風不欲去衣其邪在表甘草附子湯 食
 少飲多水停心下亦令氣短小半夏湯 身
 涼乾嘔短氣汗出不惡寒此表解而裏有水
 十棗湯 誤下太陽短氣煩燥心中懊懣因
 鞭便為結胃大陷胃湯丸 更發黃一證

喘

喘不兼熱解表家汗多潮熱裏攻邪滿胃
 合病尤須汗水嗽青龍杏去麻

經云肺氣實則喘逆上氣所以氣逆者邪氣
 為實耳傷寒發喘邪氣在表者心腹滿而不
 堅外證無汗法當汗之邪氣在裏者心腹脹
 而為滿外證有汗法當下之又有水氣作喘
 心下怔忡即水為邪是以有小青龍之證若
 經汗下逐水不獲痊愈喘促上攻壅塞而不

得息可以瓜蒂散從權吐之吁喘特病之常也其或直視讖語而喘汗出髮潤而喘身汗如油而喘皆不可救此邪氣內盛而正氣欲絕也臨機對境盍消息焉麻黃專主喘喘家湯劑多用麻黃

太陽證無汗而喘麻黃湯或誤下之利不止脈促有汗而喘葛根黃芩黃連湯下之微喘者桂枝加厚朴杏子湯發汗後不可更行桂枝湯若汗出而喘無大熱者麻黃杏仁甘草

石膏湯陽明證汗出不惡寒氣短腹滿潮熱而喘小承氣湯若脈浮無汗而喘即汗之用麻黃湯太陽陽明合病喘而胷滿勿下可麻黃湯水氣嗽喘乃太陽汗後飲水多而水停心下小青龍去麻黃加杏仁主之小腹滿者小青龍去麻黃加茯苓陰證喘則必促脈伏而厥返陰丹五味子湯鼻息鳴喘氣逆上衝孫用和用麻黃湯加吉皮杏子久喘咳嗽感冒鼻涕易簡九寶湯

咳嗽

咳嗽家嘔喘屬膀胱寒熱胃堅值少陽若是少陰頻下利四肢沉重更清涼肺主氣氣逆而不下則嗽熱邪乘之氣則燥熱寒邪乘之氣則冷滯水飲乘之又與氣搏法固自有條其間水咳三證不可無辨小青龍湯太陽之表水也十棗湯太陽之裏水也真武湯陰證之水氣也常須識之雖然古人

一藥對一病所主安在哉曰水與表寒相合而咳則小青龍汗之水與裏寒相合而咳則真武湯溫之裏癖合水動肺而嗽焉十棗所以下之也 太陽病身熱嗽喘心下怔忡乾嘔微利此水氣在表小青龍湯小便不利小腹滿者去麻黃加茯苓癸熱惡寒身體痛者只依本方若身涼咳嗽乾嘔微利心下痞滿引脇疼痛爲裏有水十棗湯 少陽病寒熱往來脅脇鞭滿而痛咳嗽小柴胡湯或微利

去人參生薑棗加五味子乾薑 少陰病水
氣咳嗽四肢痛重腹痛下利或嘔真武湯加
味子乾薑細辛少陰咳而四逆或腹痛或泄
利或悸四逆散加五味子乾薑少陰咳而嘔
渴心煩不得眠下利猪苓湯 熱咳金沸草
散或唾膿血小柴胡加黃芩或黑豆入生薑
煎湯 咳嗽頭痛不惡寒身大熱若臍腹亦
有熱而內作痛者須下之用大柴胡湯張氏
曰發汗不解腹滿痛者急下之可大承氣湯

又曰腹中滿痛此爲實大柴胡下之 咳嗽
中滿而嘔用大半夏湯解利以後胃寒不食
則理中湯加橘皮半夏茯苓細辛五味子痰
多二陳湯加細辛五味子治嗽通用大橘皮
湯

咳逆

咳逆垂危苦胃寒橘薑苓夏勝靈丹不痊
乳下應須灸腹滿之時療已難
咳逆俗謂之噫古人謂之噦蓋胃氣本虛吐

下太過或復與之水以發其汗胃虛氣逆噫
噦生焉病勢至此極矣雖然咳逆出於胃寒
固也其有水挾寒氣擊搏而成者則茯苓半
夏逐水主噫官桂丁香下氣禦寒又有熱氣
擁鬱氣不得通而成者則小柴胡加生薑自
有條例惟是噦而腹滿不得小便或後部不
通此爲真病雖有神醫末如之何
橘皮乾薑湯羌活附子散半夏生薑湯退陰
散主之以意擇用不瘥卽灸乳下其法婦人

屈乳頭向下盡處背聞三壯丈夫乳小以一
指爲率亦三壯男左女右艾員如小豆許大
抵乳直下陷中有動脈處是詳見下膿血條
證治論嘔噦手足逆冷小橘皮湯若加胃滿
虛煩不安大橘皮湯 陽證咳逆潮熱小柴
胡湯加生薑吉皮竹茹湯仍視其大小便何
部不調卽通利之噦而腹滿大便不利小承
氣湯噦而腹滿小便不利猪苓湯 陽明傷
風脈弦浮小便難潮熱而噦小柴胡加茯苓

湯 易簡論傷寒咳逆爲篤證他病見之亦
然以半夏生薑湯主之又方丁香柿蒂煎湯
調蘇合香丸大抵咳逆不止者不可救藥
水氣乘肺亦主噫逆微咳當以表水裏水法
治之見咳嗽條

乾嘔

乾嘔身熱小青龍涎沫茱萸汗桂供下利
白通并四逆脇疼十棗裏之攻
乾嘔者嘔而無物出也大抵熱在胃脘與穀

氣并熱氣上熏心下痞結則嘔而無所出焉
少陰下利姜附主下利也厥陰吐沫茱萸主
涎沫也汗出乾嘔桂枝主自汗也邪去則嘔
者定矣若夫水氣二證又當以表裏分之發
熱欬喘而乾嘔者此則水氣在表與青龍湯
不發熱不惡寒脇痛咳利而乾嘔者此則水
氣在裏與十棗湯是又不可無別然而表水
裏水皆有咳嗽何耶曰水氣乘肺也
表不解心下水氣身熱乾嘔微喘或利小青

龍汗之 乾嘔吐涎沫頭痛一云少陰一云
 厥陰並吳茱萸湯得湯反劇者則與小柴胡
 湯 汗出頭痛乾嘔桂枝湯 少陰下利乾
 嘔脉微白通湯利不止乾嘔而煩厥逆無脉
 白通加猪膽汁湯裏寒外熱脉微欲絕或乾
 嘔通脉四逆湯 身涼汗出脇疼乾嘔心下
 痞硬短氣欬而微利不惡寒無表證此裏有
 水十棗湯下之 膈上有寒飲乾嘔亦屬少
 陰用四逆湯 證治論乾嘔而利黃芩半夏

生薑湯 胃中似喘不喘似嘔不嘔似噦不
 噦憤憤然無奈者生薑半夏湯

嘔吐

嘔吐陽明氣逆行數為胃熱緩寒生太陽
 合病利不利腎證三條各有評
 表邪傳裏裏氣上逆則為嘔吐水穀不下是
 也傷寒嘔吐有胃熱有胃寒有水氣有膿血
 辨是四者而已胃熱者脉數或緊必有口苦
 舌乾煩渴之證胃寒者脉弦而遲必有逆冷

下食大小便自利之證水氣者先渴後嘔滿
滿怔忡若胃脘膿血則腥氣燥氣奔逆上衝
經所謂嘔家有癰膿不須治膿盡自愈又謂
服桂枝湯吐者其後必吐膿血是矣大抵嘔
吐皆有所出已下咽而出者嘔也未下咽而
出者吐也吐特甚於嘔耳若槩以嘔無所出
則其間所謂乾嘔者獨何耶嘔吐多屬陽明
氣逆而上行戒不可下汗後水藥不入口者
逆嘔而脈弱小便自利微熱而厥者虛極難

調也牛薑嘔家聖藥熱燥者烏梅代之

陽明嘔吐小柴胡湯加生薑主之陽證通用
嘔而發熱小柴胡湯嘔而渴猪苓湯先嘔後
渴此爲欲解急與水解先渴後嘔爲心下停
水赤茯苓湯汗後或瘥後胃脘餘熱虛煩嘔
吐竹葉湯加生薑汁吐汗下後虛煩不得眠
而嘔梔子生薑湯寸脈數煩熱而吐爲胃
熱五苓散竹茹湯小柴胡湯汗下後關脈
遲緩而吐爲胃寒理中湯正氣散加生薑寒

多不飲水而吐理中湯去朮加生薑 太陽
少陽合病自利而嘔黃芩加半夏生薑湯
太陽陽明合病當自利若不利但嘔葛根加
半夏湯胃中有熱胃中有邪氣腹痛氣逆欲
嘔黃連湯 太陽發熱汗出心下煩鬱痞鞭
下利嘔吐大柴胡湯 少陰嘔證四逆湯加
生薑水氣或欬或悸身痛自利真武湯去附
子加生薑膈上寒飲乾嘔吐涎沫四逆湯若
更吐利手足逆冷煩躁甚者吳茱萸湯又手

足寒心中溫溫欲吐不得吐脉弦遲爲胃中
實可吐之或用半夏湯入生薑汁並屬少陰
溫毒發斑心悶而嘔身熱足冷有本條 水
逆證渴欲飲水水入卽吐小腸不利故也五
苓散小半夏茯苓湯 金匱云諸嘔吐穀不
下小半夏湯似嘔似噦似喘心中潰潰生薑
汁半夏湯大小橘皮湯 傷寒屢經吐下寒
氣隔塞食入口卽吐乾薑黃芩黃連人參湯
汗後水藥不入口者逆半夏茯苓湯 嘔吐

膿血見吐血條

吐血

吐血諸陽受熱邪表之不發咎鑿家因而
熱毒流於臟地血三黃數劑嘉

諸陽受熱其邪在表當汗不汗致使熱毒入
臟積瘀於內遂成吐血蓋傷寒失汗則邪熱
化爲惡血或蘊毒不除亦能蒸腐其血凡眼
閉目紅神昏語短心忪痛悶眩冒迷忘漱水
燥煩嘔吐喘促驚狂譏語鼻衄唾紅背冷足

寒骨熱膚開四肢厥逆多汗頑痰胃脇小腹
滿急大便黑而微利小便多而不禁此等皆
瘀血證也男女均有此血脉婦人傷寒尤多
見之以其得病於經水來去之期或受病中
間經水適至耳血之爲痛大抵夜重日輕或
晝明了而暮譏語血屬陰從其類也前證不
必悉具但見其一二分曉便作血證主張犀
角地黄湯小柴胡湯桃仁承氣湯三黃湯丸
酌量輕重用瘀血結甚抵當湯丸主之諸湯

皆以川芎爲佐取盡大便黑物則佳雖然傷寒咯血猶難救療况吐血乎凡吐血皆非美恙初病猶可用工有陸續而來或經數時而復吐者斷不可救藥也 方藥詳見解題通用蘿蔔汁一小盞入新汲水煎茅花主之血熱者黃連阿膠湯證治論用地血散藥皮湯三黃瀉心湯 大下後寸脉沉遲尺脉不至咽喉不利唾膿血者麻黃升麻湯此有兩證一陽毒一少陰在陽毒則或用陽毒升麻湯

在少陰則或用甘梗湯加半夏生薑汁 服桂枝湯吐者其後必吐膿血犀角地黄湯非傷寒證而吐血者與蛤粉散若虛勞咳嗽吐血口苦咽乾真黃耆湯主之

衄血

衄血膀胱病欲瘳脉微發表病家愁緊而無汗麻黃進浮緩藥藥以桂投 經絡熱盛陽氣擁重迫血妄行出於鼻者爲衄其熱在表也是雖表熱邪猶在經然亦不

可發汗汗之則額上陷脉緊急直視而不得
 臥古人戒之所以無汗用麻黃有汗用桂枝
 者非治衄也散其經中邪氣耳若邪氣不得
 發散擁迫於血而衄復不止也太陽衄血固
 為欲解或有衄血不止但頭面汗出其身無
 汗及發汗不止足者又為惡證當明辨之
 太陽證衄血及服桂枝湯後致衄者皆陽氣
 盛長病欲解也屬犀角地黄湯 衄而脉微
 不可發汗與犀角地黄湯黃芩芍藥湯衄不

止茅花湯 無汗而衄脉尚浮緊可再與麻
 黃湯 有汗而衄脉尚浮緩可再與桂枝湯
 衄而煩渴欲飲水水入即吐者先服五苓散
 次服竹葉湯 陰證本無衄若少陰厥而無
 汗強發汗必動血血從耳目口鼻而出是為
 下厥上竭不可治治要方用黑錫丹 千金
 云凡時行衄血不可斷之如或過多即可斷
 以龍骨末吹入鼻九竅出血通用 陽明發
 熱口燥漱水者必衄見漱水條謹不可汗

膿血

下膿血室必譏言濕毒無如腸垢鮮消穀
糞堅臍下蓄膀胱熱結六條全

衝脉爲血之海卽血室也男女均有此血氣
亦均有此衝脉衝之得熱血必妄行在男子
則爲下血譏語在婦人則於經水適來適去
之時經氣尙虛邪乘虛入或熱退而胃滿譏
語或蓄血而寒熱似瘧皆謂之熱入血室私
竊恠夫世俗常談凡病皆先調氣而血之一

字念不到焉其間一二亦知理血則曰婦人
有之不思血氣則陰陽也負陰抱陽中兩間
而爲人誰獨無此血氣哉否則張朱之書所
謂桃仁承氣湯抵當湯丸之類是特爲婦人
設耳然而血證之脉何如曰狹血者脉來乍
澁乍數閃灼明滅或沉細而隱伏也若夫血
熱交攻則寸關洪盛大抵多於左手見之左
手主血固如是爾經云血上逆則忘血下蓄
則狂下焦蓄血小便必自利血結之處又當

以此推之外證具于吐血汗解

陽明病下血譫語或胃脇滿如結胃暮夜如見恠狀此為熱入血室頭汗出者刺期門以瀉肝若不刺合用小柴胡湯加生地黃枳殼梔子仁 腹痛身熱下膿血如魚腦如爛肉汁曰濕毒桃花湯地榆散黃連阿膠丸治要方用胃風湯加木香或除濕湯 熱氣乘虛入於腸胃臍下有熱泄汗赤黃白腸垢黃芩湯白頭翁湯蘗皮湯 無表裏證已下後脉

數不解消穀易飢冬日不大便此有瘀血桃

仁承氣湯抵當湯或小柴胡加桃仁大黃又脾約證胃熱消穀有本條 下焦蓄血其人如狂小腹結急小便必自利與抵當丸或小柴胡加桃仁大黃抵當湯大峻合用者只與抵當丸 太陽病不解熱結膀胱其人如狂而血自下下者愈不愈用桂枝湯 瘀血炙甘草半錢川芎香附倍之枳殼又倍之新汲水煎入醋下 失血少血或尺脉遲或諸脉

不出湯劑中須以人參爲佐
期門卽三焦之府取穴以病人中指中節爲
寸令仰臥從臍心正中向上五寸以墨點定
從墨點兩邊橫量各二寸半大約直兩乳是
期門穴也針入四分此證治論穴法可與咳
逆條乳下穴參用

發黃

發黃尿秘引清漿便黑尿多血證黃身熱
盡疼爲中濕鼻乾腹滿胃風傷

發黃者濕氣在裏復於熱於脾胃蒸濕不散
而得之或病屬陽而用溫內熱而被火亦發
黃也濕氣勝則如熏黃而晦熱氣勝則如橘
黃而明傷寒至於發黃單陽無陰病勢已極
不可以尋常目之如所謂寸口無脈鼻出冷
氣如所謂形如煙熏搖頭直視如所謂環口
蠶黑柔汗發黃不治者亦多矣然而發黃之
與瘀血大抵相類又何以辨之曰小便不利
者爲黃小便自利則瘀血也 千金云酒疸

下之終為黑疸土瓜連根搗取汁効
 黃疸證脉浮滑而緊數尿秘頭面汗出及頸
 而止渴引水漿茵陳湯五苓散夾和茵陳湯
 或五苓散下酒蒸黃連圓 血證發黃如狂
 小便多大便黑桃仁承氣湯犀角地黃湯抵
 當圓 太陽中濕發黃身熱盡痛頭汗目黃
 蓋寒濕在裏致之可五苓散梔子藥皮湯若
 欲解散則用麻黃連翹赤小豆湯餘見中濕
 條中濕與發黃不利小便非其治也 陽明

傷風發黃易飢氣短腹滿鼻咽乾心脇痛小
 便難潮熱咳嗽咽痛息短頭眩嗜卧脉弦浮
 大小柴胡加茯苓 初發黃急用瓜蒂末口
 含水搐一字許入鼻中出黃水次服茵陳五
 苓散

發斑

斑如溫毒黑膏良熱病重陽別有力裏實
 表虛因發出若還發汗愈增瘡
 病證屬陽誤投溫藥或當汗不汗或當下不

下或汗下未解陽熱內然蒸滯外迫熱毒入胃皆致發斑蓋熱必傷血血熱不散裏實表虛由是熱氣乘虛出於皮膚輕則如疹子重則如錦紋是爾斑家謹勿發汗汗之里令開泄瘡爛又加多也凡斑略見一二須早圖之日子稍延獨陽絕陰不可救藥其發黑斑者熱劇胃爛無及矣然而斑之方萌與蚊迹類焉又不可誤用藥也發斑多見於胃腹蚊迹多在手足之間關前陽脉洪大病人昏潰先

紅後赤者斑也陽脉不洪病人自靜先紅後黃者蚊也發斑屬陽陽毒具而陰脉形或大便自利或佛鬱氣短而燥糞久不得通虛扁復生莫能施其巧

溫毒發斑冬月冒寒至春間陽氣盛則發病經此汗下而表未解毒未消也黑膏主之肌肉斑爛咳而心悶下利嘔吐清汁下部瘡或口瘡黃連橘皮湯葛根橘皮湯熱病發斑時氣發斑大青四物湯猪膽雞子湯陽毒

日重陽發斑有本條 咽痛者玄參升麻湯
發斑通用升麻葛根湯敗毒散犀角地黃湯
熱多者玄參升麻湯加生薑烏梅又黃連一
物湯青木香一物湯可擇用有下證者少與
調胃承氣湯孫兆用紫雪一劑證治論用白
虎加人參湯 發斑湯劑須以紫草川芎爲
佐血熱內結者與小柴胡湯 發斑小點稀
疎色常鮮紅者易治或如錦紋癰起餅搭者
難治若初發色紅漸次微黯良久黯又轉甚

面色肌肉黧晦者斷不可救初發便如黑誌
者亦然赤斑五死一生黑斑十死凡內外熱
熾汗下不解煩悶咳嘔足冷耳聾便是發斑
之證

舌白胎

舌胎大熱療應難利腹疼兮嘔惡寒懊懣
脇堅并中濕更兼臟結六條看
病家邪氣在表舌上無胎自傳入裏津液結
搏則舌生白膜如胎之狀是亦丹田有熱也

熱初傳裏其舌胎滑熱氣漸深其舌胎澀熱
聚於胃舌爲之黃若舌間黑色則病已深而
熱已極矣經云熱病口乾舌黑者不治蓋舌
屬心心屬火黑者腎家賊熱所勝五臟反尅
其能生乎

尺寸脉緊口中熱氣而乾燥足冷踈卧鼻中
涕出舌上胎滑勿妄治也到七八日以來微
熱手足溫爲欲解或七八日以上反大熱者
難治若腹痛者必欲利與理中湯若惡寒者

必欲嘔與小柴胡湯加人參括萸根 太陽
誤下胃中空虛客熱動膈懊懣舌胎梔子豉
湯或陽明證具其脉浮緊下之而懊懣舌胎
用藥同 陽明脇下鞅滿不大便而嘔舌上
白胎小柴胡湯 陽明中濕舌上生胎以丹
田有熱胃中有寒濕也五苓散主之 臟結
亦屬陽明舌上白胎有本條 舌黃者法當
下之舌黑者不治
口燥咽乾

口燥陽明背乍寒人參白虎療咽乾少陽
專以柴胡治腎證應須急下安

脾胃有熱津液涸少所以口燥舌乾然而口
中乾燥汗之將何如曰汗之重無津液其咽
乾者尤不可汗也治法固自有條或依條用
藥而口中尚更不和則當以瘀血推之蓋焦
煩漱水口燥唇乾血證有之矣 陽明口燥
咽乾無大熱背微惡寒煩渴白虎加人參湯
渴欲飲水者用藥同 少陽口燥咽乾小柴

胡湯 少陰口燥咽乾而渴者急下之用承
氣湯 血證口躁唇乾見漱水條 狐惑咽
乾唇瘡聲啞有本條

煩燥

煩燥來時熱氣升陰為陽勝太陽經陽明
躁糞連臍痛腎候陽虛陰燥乘

心主火腎主水心熱則煩腎熱則燥此通論
也傷寒煩燥則有陰陽虛盛之別焉陰虛而
陽勝則為煩陽虛而陰勝則為躁有先煩而

類聚三十五

漸加躁者有先躁而後復煩者煩其熱之輕燥其熱之甚也或邪在表或邪在裏或陽勝或陰勝或火邪條例不一當詳審而調理之設若結胃證具而煩燥吐利四逆而煩燥下利發熱厥逆而燥不得眠惡寒踈攣脉不出而燥此皆不治之證或者見幾而作聲之可乎
太陽證煩燥寸關脉浮數身熱是也風寒俱盛其脉浮緊無汗而煩燥當汗不汗其人煩

燥並用大青龍湯心中悸而煩燥小建中湯熱六七日渴欲飲水五苓散無熱但狂言煩燥五苓散水調服刺吐之自汗心煩小便數不可與桂枝湯只用芍藥甘草湯服桂枝後汗出煩渴甚脉洪大白虎加人參湯前陽明證煩燥以多日不大便有燥糞故遶臍痛而煩燥也以承氣湯隨輕重用少陰證煩燥尺寸俱沉厥冷自利是也心煩不得卧黃連雞子湯黃連阿膠湯吐利厥逆煩躁欲死吳

類聚三十五

八十五

柴萸湯茯苓四逆湯下利咽痛心中煩滿猪
膏湯下利嗽嘔煩渴不得眠猪苓湯惡寒而
蹠時時自煩欲去衣被大柴胡湯太陽病
以火熏之而不得汗亦致煩燥或火熨其背
令人汗出大熱入胃而煩燥並黑豆煎湯解
之汗後煩不得眠欲水者少與之小便不
利與五苓散下後晝煩夜靜不嘔不渴無
表證脉沉微乾薑附辛湯若兼懊憹卽與梔
子豉湯發汗若下之病仍不解而煩燥茯苓

四逆湯吐汗下後虛煩心下痞滿氣上衝胃
頭眩經動身爲振搖茯苓桂枝白朮甘草湯
虛煩附入胃滿條下後胃弱不能勝穀亦
致微煩減穀則愈仍與小柴胡湯陰極發
燥或陰毒用火熨灸及投熱藥以致發燥者
並不可誤用涼藥燥甚仍與熱劑用四逆湯
返陰丹陰盛隔陽身冷大燥欲飲水不入
口不得睡脉細沉緊有本條
渴

渴爲浮脈太陽臨汗是陽明利少陰陽毒
熱多并中暑其人引飲喜盃深

熱氣薰蒸津液耗少所以發渴熱邪深淺條
例不同然是渴者大抵裏有熱也或曰六經
外證獨少陰曰渴厥陰曰煩何耶少陰屬腎
主水熱氣旣深腎水易竭安得而不渴厥陰
屬肝心之母也病主消渴飲水多而小便少
是其裏熱已極子氣乘母於是挾心火以爲
煩惟煩則消矣凡渴證用藥並去半夏以其

性燥而逐水也若先嘔後渴則爲欲解當與
之水先渴後嘔則爲水停心下屬赤茯苓湯
故併述之

太陽發渴則脈浮表不解心下水氣小青龍
湯去半夏加栝樓根服桂枝湯汗出後煩渴
甚者白虎加人參湯小便不利而渴五苓散
身熱惡風手足溫脇滿而渴小柴胡去半夏
加人參栝樓根太陽病無汗而渴勿用白虎
湯可小柴胡若得汗後脈洪大而渴可少與

白虎湯 風温灼熱而渴 活樓根湯 陽明

發渴則有汗 脇下鞭不大便而嘔 舌上白胎

小柴胡去半夏 加人參 栝樓根 陽明病汗多

而渴 勿用五苓散 可竹葉湯 若汗少小便不

利 脉浮而渴 與五苓散 一云猪苓湯 然本方

內有阿膠 滑石 其性尤利 又當審之 發黃證

頭汗出 小便不利 渴引水漿 茵陳湯 茵陳五

苓散 少陰發渴 則自利 咳而嘔 引水飲 猪

苓湯 下利而渴 欲飲白頭翁湯 脉微細 欲吐

不吐 心煩但寐 小便白 下利而渴 四逆湯

陽毒大熱 大渴 黑奴圓主之 中暑渴者 白

虎加人參湯 若渴不已 與酒蒸黃連圓 渴

欲飲水 水入則吐 日水逆 五苓散

漱水不嚥

漱水 陽明衄血 時頭疼 口燥熱 生肌發狂

瘀血 無寒熱 犀角 桃仁 類例推

唇燥 口乾 血證 類有之 必欲取水 而灌漱也

然漱水而不飲水 何哉 蓋渴者易為飲 陽熱

入裏胃中液乾患不與水耳惟夫上焦瘀血
下焦蓄血乘肺發燥渴證獨無是以漱水而
不欲下咽也漱水條例惟血證有焉
陽明身熱頭疼口躁漱水不欲入咽必衄血
脉微者犀角地黄湯棠花湯 無表證不寒
熱胃腹滿唇躁口乾漱水不嚥小便多此爲
瘀血必發狂輕者犀角地黄湯桃仁承氣湯
甚者抵當圓取盡黑物爲度

可與水

可水除煩使胃和常須少與勿令多若還
不與無由汗強與還因水致痲

病非大渴不可與水渴不與水無由作汗則
喘而殂也傷寒飲水是爲欲愈之候若渴者
與之過多或小渴而強與之飲腹中熱少一
不能消停飲作害者多矣曰水結曰喘悸曰
咳噎曰嘔噦曰腫滿曰下利曰小便不利安
有不自水氣得之診視又當識此
太陽病發汗後大汗出胃中燥不得眠其人

欲飲水當少與之胃和則愈 厥陰病渴欲
飲水者與水則愈 霍亂發熱頭痛身疼熱
多飲水者與五苓散 嘔吐病在膈上後必
思水者與猪苓湯 水逆證見嘔吐條 水
結證見頭汗出條 飲水多水停心下氣上
乘心則為悸水氣結於胃脇則為水結胃胃
中虛冷則為嘔噦冷氣相搏為噎上迫於肺
則為咳喘瀆入腸中則為下利邪熱所搏畜
於下焦則為小便不利小腹滿而裏急溢於

皮膚則為腫重 飲水過多者五苓散導之

小便自利

小便自利血相干蜜導陽明腎證寒脾約
譎言脚攣厥太陽汗下大便難

小便自利非血證則腎虛也惟血證則小腹
結而如狂惟腎與膀胱俱虛則不能約制水
液是二者小便皆自利也若腎虛而挾熱焉
故乍瀝乍施謂之小便數
傷寒下焦有熱小腹必滿應小便不利今反

自利者此血證也法當下之又有病在太陽
遍身發黃其脈沉結小腹雖堅而小便不利
則非血若或小便自利其人如狂血證諦
矣下之抵當湯圓 陽明自汗應小便少而
反自利者津液竭也糞雖硬但以蜜導豬膽
汁亦可以導 少陰四逆小便自利爲虛寒
用四逆湯或真武湯去茯苓若小便白亦是
下焦寒與四逆湯 小便數大便鞭此爲脾
約脾約圓麻仁圓主之張氏云跌陽脈浮而

濇浮則胃氣強濇則小便數是爲脾約跌陽
胃脈也此證消穀引飲蓋胃壯而熱矣 傷
寒脈浮自汗小便數若胃不和而譫語少與
調胃承氣湯 太陽自汗四肢拘急心煩微
惡寒脚攣急小便數誤服桂枝得之便厥可
與甘草乾薑湯芍藥甘草湯 太陽吐汗下
後小便數大便因鞭小承氣利之 小便尿
血證治論用延胡索散

遺溺

遺溺風溫戒利腸腹澎身重合三陽下焦
不攝兼停血腎絕狂言五證詳

水液之餘者入胞而爲小便胞中虛寒不能
約制水液加以邪氣乘之故旋溺自遺而不
禁也風溫脉浮自汗體重多眠鼻鼾喘息恬
不欲言誤下則小便不利直視失溲三陽
合病腹滿身重口中不仁面垢譫語遺尿並
不可汗下小與白虎湯膀胱瀦水下焦不
攝則亦遺溺經云邪中下焦陰氣爲慄足膝

逆冷便溺妄出合用四逆湯 下焦蓄血小
腹結急小便自利不禁輕者桃仁承氣湯重
則抵當湯圓 狂言直視遺尿腎絕不治

小便難

小便汗渴胃乾空多汗陽明並戒通引飲
濕黃須要利澁難虛熱客胞中

汗自外泄津液中乾此小便所以不通也或
陰虛而陽湊之小腸伏熱亦令旋溺赤黃數
且難矣素問曰陽入陰分則膀胱熱而小便

難其謂是乎多汗者以利小便為戒伏熱者以涼劑行之若夫中濕發黃不利小便非其治也 發汗多亡津液胃中乾小便不利及陽明汗多小便不利者並不得利之小便自利則愈 引飲過多下焦有熱小便不利脉浮者五苓散脉沉者猪苓湯 中濕發黃家並與利小便 小便難者陰虛而陽溼之故小便黃為下焦熱以瞿麥滑石輩利之木通散亦可太陽汗後漏不止而惡風四肢急小

便難桂枝加附子湯陽明中風脉浮弦大身黃鼻乾氣短腹滿潮熱時噦心脇痛嗜附小便難小柴胡加茯苓 表有水氣身熱而咳表不解心下停水小腹滿小便不利小青龍湯去麻黃加茯苓汗下後發熱頭項強痛無汗心下滿微泄小便不利桂枝湯去桂加茯苓白朮嘔而發熱胃脇滿心下怔忡小便不利小柴胡去黃芩加茯苓少陰病小便不利四逆散加茯苓 瘥後腰下有水氣牡蠣澤

瀉散主之

大便下利

利唯膽胃負時殂不渴脾寒渴腎虛腸垢
鴨溏并濕毒讖言備載古人書

下利須別陰陽三陽下利身熱太陰下利手足
足溫少陰厥陰下利身涼無熱此大槩也自
利不渴小便色白脈微清穀厥冷惡寒凡此
皆寒渴欲飲水尿色如常泄下赤黃發熱後
重凡此皆熱要之風邪入胃木來勝土故大

腸暴下其裏虛協熱者下利尤多或解散或
和解或攻泄或溫中或固下焦或利小便隨
證有條但不容發汗蓋邪氣內攻若外復泄
其津液則胃氣轉虛必脹滿矣然則下利之
脈何如曰身涼脈小者順身熱脈大者逆大
則爲虛微弱則自止滑而數者是又有宿食
也若大下利譫語而目直視下利厥燥而不
得眠下利發熱汗不止或厥不止下利厥冷
無脈灸之身不溫而脈不回下利日十餘行

其脉反實皆邪擁正氣而下脫五奪之最急者也雖有工功將焉用哉
 太陽陽明合病下利頭疼目疼鼻乾脉浮長葛根湯
 少陽陽明合病下利頭疼胃滿乾嘔脉浮弦黃芩湯
 嘔者加半夏生薑
 少陽陽明合病下利身熱胃脇滿乾嘔往來寒熱脉長大而弦為負負者死但長大而不弦為順又脉滑而數則有宿食小承氣湯下之遲而滑者亦少下之
 太陽自利不渴四逆湯理中湯朮附湯

少陰自利必渴腎虛引水自救脉微者白通湯厥逆無脉白通猪膽汁湯通脉四逆湯若渴而嘔嗽心煩不得眠猪苓湯自利清水色青心下必痛口中乾燥此不可溫須下之用大承氣湯三陰下利法當用溫若自利清水心下痛口乾燥須下之下利發渴屬少陰也然三陽亦有飲水者乃有熱也
 協熱利者曰腸垢臍下必熱便中垢膩赤黃或飲水乃熱也黃芩湯白頭翁湯檉皮湯此證惟黃

苓最妙凡協熱下利通用之 胃寒利者白
鳴澹臍下必寒腹脹滿便中黃白青黑或清
穀四逆湯理中湯白通加附子湯寒毒下利
面戴陽者下虛也 濕毒利者腹必痛下膿
血如魚腦如爛肉汁桃花湯地榆散黃連阿
膠湯或用除濕湯胃風湯加木香 下利譫
語有燥尿也脉不微細可下之用小承氣湯
三部脉平心下硬而下利者腸胃有積結也
急下之 下利心下痞者詳見痞條 陰毒

陽毒亦有下利有本條 下利身痛腹滿清
穀急攻裏用四逆湯服藥後清穀止但身痛
者急解表用桂枝湯 固下焦利小便方論
見痞條風邪入胃下利熱則敗毒散冷則不
換金正氣散或加乾薑木香 假如他病腸
風失血崩中漏血之人繼而下利大腸裏急
痛不可忍雖與巴粉取積已行踈導其痛獨
存者此非積也榮血虧少陽剛勝陰故爾投
藥當以川芎爲佐榮氣一調其痛立止設或

小便不通五苓散不能作效當以分心氣飲加川芎麥門冬與之自然快利或蘊熱血痢腹中痛甚踈通滌熱痛未得平亦當爲之調

霍亂

霍亂渴來用五苓寒多不水理中尋憎寒厥熱薑甘附中暑焦煩腹痛侵

張氏但稱吐利者非霍亂也霍亂邪在中焦以飲食無節居處不常得之夾食傷寒陰陽

乖隔上吐下利而燥擾痛悶是其候爾偏陽則多熱偏陰則多寒卒然而來危甚風燭許仁則謂濕霍亂死者少乾霍亂死者多蓋以所傷之物或因吐利而出泄泄盡則止其死少也夫上不得吐下不得利所傷之物擁閉正氣關隔陰陽煩燥喘脹其死多也夫飲食起居當以此爲戒霍亂吐利熱多而渴五苓散寒多而不飲水理中湯圓或有寒腹滿而痛四肢拘急轉筋下利者剉理中湯加

生附子官桂 吐利汗出發熱憎寒手足厥
冷拘急其脉沉細四逆湯 中暑霍亂煩燥
大渴心腹撮痛四肢冷冷汗出脚轉筋香薷
散千金云轉筋者用理中湯加煨石膏 汗
後霍亂雖吐利已止而身痛不休少與桂枝
湯吐利已止汗出四肢厥而拘急脉微欲絕
通脉四逆加猪膽湯 霍亂通用霍香正氣
散腹痛加桂痛甚去霍香加茱萸小便不利
加茯苓瀉而不吐除濕湯加桂吐而不瀉除

濕湯去蒼朮加桂丁香 乾霍亂心腹作痛
欲吐不吐欲下不下先以鹽湯一盞頓服候
吐出令透卽以剉理中湯倍加橘紅與之凡
氣痞于中不吐不瀉害人甚急可蘇合香圓
用枳殼散下或用霍香正氣散加官桂茯苓
倍加枳殼大抵風雨寒濕邪自外入霍香正
氣散除濕湯爲要飲食居處邪由內發治中
湯主之其或吐瀉不止面青厥冷者震靈丹
研開木香乾薑煎湯調下 大柴胡湯一證

辨別三五

辨別三五

類聚三五

三五

云發熱汗出不解嘔吐下利而心下痞者大柴胡主之此則非霍亂也

失音

失音發瘥反張弓狐惑唇瘡啞似聾風濕血迷并舌卷更兼中暑語難通

言心聲也而聲音道路出於喉嗌肺亦主之若風若痰若血若熱與夫邪毒之氣伏於心竅或滯於喉間皆令人失音或語短而聲蹇澁也活人書惟有發瘥狐惑條例風濕而下

諸家之正說附焉 瘥證口禁頭暈掣癱不

語項強背直腰身反張有本條 狐惑即濕

蟻也虫食下部為狐下唇有瘡其咽乾虫食

其臟為惑上唇有瘡其聲啞有本條 風濕

內有一證緩弱昏迷腹滿身重白汗失音下

利不禁白通湯加白朮甘草 血證心忪語

短眩冒迷忘詳見吐血下膿血條 厥陰舌

卷囊縮毒氣入臟或有不語此用小承氣湯

伏暑發熱汗渴暑入心胞絡亦或不語此用

小柴胡湯熱渴甚者用竹葉湯風纏喉隘不語細辛皂角末入鼻通關次用南星略炮加生薑紫蘇熟煎與之失音亦須調導大小便

佛鬱

佛鬱陽蒸聚體膚便堅為實噦為虛二陽併病顏容赤火迫身黃惕惕如佛鬱者陽氣蒸越形見於頭面體膚之間聚赤而不散也其證則有異焉大便鞭而氣短

者實也汗下後而得噦者虛也若虛若實當詳審之小便不利時有微熱大便乍難佛鬱而不得臥此燥糞裏實也承氣湯主之吐下後極虛而汗之其人佛鬱復與之水以發其汗因而得噦此胃中寒也桂枝人參湯加茯苓太陽初得病發汗不撤併歸陽明續自微汗面色赤者陽明佛鬱也解肌湯主之或汗又不撤其脉緊瀼與麻黃湯陽脉浮陰脉濡弱妄以火熏熨欲令汗出客熱得

火內則驚惕外則怫鬱蒸肌身目發黃小柴
胡湯加黑豆與之

冒眩

冒因虛極有寒傷頭痛胃堅屬二陽吐汗
下餘苓桂朮脉沉自利理中湯

冒者蒙冒之謂眩者眩運之謂上虛則眩諸
虛極而乘寒則冒二者皆相似眩其輕而冒
其重也婦人新產血虛挾寒必冒冒家自汗
則愈若少陰病下利止而頭眩時時自冒者

此虛極而脫也其與諸逆發汗劇者言亂目
眩設遇岐扁其能起之乎

太陽少陽併病頭項強痛或眩冒胃中痞鞭
刺天顛戒不得發汗少陽本證亦有日眩見
本條 陽明傷風頭眩見發黃條 吐汗下
後虛煩脉微或沉緊心下痞脇下痛氣衝胃
喉眩冒身搖筋脉動惕久而成萎伏苓桂枝
白朮甘草湯 脉沉遲面微赤身微熱下利
清穀者必鬱冒汗出證屬少陰理中湯甘草

乾薑湯四逆湯隨輕重用 太陽病若下之不愈因復發汗以此表裏俱虛其人必冒冒家汗自出而愈 又痰飲眩冒厥逆少與芩簡三生飲感濕頭重眩暈芎朮除眩湯 金匱曰產婦亡血復汗寒多故冒又曰產婦厥冒其脉微弱不能食大便堅蓋血虛則厥厥而必冒皆是虛寒

心動悸

心悸三陽證自詳糞堅譏語胃調湯冒旋

甘桂朮真武小建中兼炙草方

動悸多生於停水或陽氣尙弱心下虛空正氣內動致之或汗下以後氣正內虛邪氣與之擊搏而然也此蓋心悸而氣動其與驚惕不同焉 太陽病小便利者以飲水多故心下悸小便少者必膀胱裏急也並用五苓散小半夏茯苓湯主之 陽明病壯熱往來心下悸小便不利心煩喜嘔小柴胡湯傷風往來寒熱或心下悸小柴胡湯 少陽病脉弦

細頭痛發熱誤汗之必識語轉屬胃胃和則愈胃不和則煩悸而大便鞭屬調胃承氣湯然調胃承氣湯太峻證治論只用小柴胡湯糞鞭者可加大黃煩燥者可入芒消些少凡調胃承氣證以此法代之尤為穩當 太陽發汗過多其人叉手自旋冒心下悸欲得按者桂枝甘草湯 太陽病發汗不解仍發熱心下悸頭眩肌體瞶動振振欲擗地者真武湯主之或理中湯加茯苓 傷寒二三日心

中悸而煩與小建中湯經云先煩而後悸者為熱先悸而後煩者為虛惟虛則小建中主之 少陽病耳聾目赤胃滿而煩妄加吐下則悸而驚可與小建中湯如有熱證即以小柴胡繼之 傷寒脉結代心動悸炙甘草湯少陰四逆證其人或悸以四逆散加桂主之心下水氣厥而悸當先治水茯苓甘草湯然後治厥有本條不然水入胃必下利也 傷寒多因吐下或火熏或溫針以致驚惕 太

陽病若下之胃滿煩驚小便不利譫語身重
難以轉側用柴胡牡蠣龍骨湯不可發汗
風溫妄用火熏以致發黃劇則如驚癇時時
瘈瘲此爲逆也金匱風引湯

發狂

發狂面赤屬重陽葶藶升麻及大黃血證
身黃仍漱水尿多承氣地黃湯

陰邪併於陰則顛陽邪併於陽則狂傷寒熱
毒在胃併入於心遂使神志昏亂言動急速

而發狂也狂之發作少臥不飢妄語妄笑妄
倨妄辨妄起妄行棄衣而走登高而歌甚則
踰垣上屋皆獨陽亢熱使之非吐下不能止
亦有當汗不汗瘵熱在裏下焦蓄血而如狂
者小便必利特如狂而未至於狂耳其或熏
熨迫汗灼艾燒針令人煩燥卧起不安則謂
之火邪驚狂凡是數者各有條例若夫狂言
直視旋溺自遺其與汗後熱多脉躁狂言不
食智者寒心焉

重陽卽陽毒脉實數狂走錯語煩燥乾嘔而
赤咽痛潮熱發斑亭歷苦酒湯陽毒升麻湯
梔子仁湯三黃湯大黃散升麻葛根湯加大
黃狂走者水調瓜蒂末吐痰瓜蒂散亦可吐
血證如狂脉微而沉身黃唇燥漱水不欲下
咽無寒熱小腹鞭滿小便利大便微利而黑
輕者犀角地黄湯重者桃仁承氣湯或抵當
圓取盡黑物爲效張云太陽病不解熱結勝
胱其人如狂而血自下下者愈若外不解可

與桂枝湯外已解但小腹結急乃以桃仁承
氣湯攻之大抵傷寒當汗不汗熱畜在裏熱
化爲血故喜忘如狂陽狂寒水石黃連末
各一錢冷水調下皆效發斑妄語未可下者
龍膽草一物湯火邪驚狂者醫家以火熏
熨迫汗及燒針灼艾而然也其人亡陽煩燥
臥起不安金匱風引湯柴胡加龍骨牡蠣湯
桂枝甘草龍骨牡蠣湯柴胡加龍骨牡蠣湯
又火劫腹滿微喘口乾咽爛或不大便讖語

用小柴胡湯黑豆解火邪湯

直視

直視無神不轉睛衄兼少血汗猶輕遺尿
喘泄搖頭證脉濇循衣並卒傾

水之精爲志火之精爲神五臟六腑之精皆
上注於目病人邪氣極盛冒其正氣遂使神
志不慧目不轉睛而爲之直視傷寒至於直
視證候最逆不救者多亦有反目倒窺眼睛
上騰此則腎絕雖昌陽引年亦不及新矣

衄血不可汗汗之則額上陷脉緊急直視不
能詢不得眠 少血者肝氣虛目力弱若又
發汗亡陽則陰陽俱虛必至直視二者雖逆
猶未甚也 狂言遺尿反目直視腎絕不治
直視譫語喘滿者不治下利者亦不治 搖
頭直視形如煙熏心絕不治 循衣摸床惕
惕不安微喘直視日晡潮熱下之後脉弦者
生脉濇者不治弦爲陽濇爲陰是陽病見陰
脉邪盛而正脫也 無表裏證目中不了了

睛不和大便難身微熱此非直視蓋內實也
小承氣湯大柴胡湯

醫方類聚卷之三十伍

